

ማርቆስ ፃፊዳ ዩሱፍ ኪሪስቶስ ዋንጌላ ጋሳ ቆፋ

ማርቆስ ዋንጌላይ፡ «ሃይሲ ያሳ ናዓ ዩሱስ ኪሪስቶስ ዋንጌላ ደሜላ» ጊሼ ኮይሮ ደሜሰ። ሃ ዋንጌላን ዩሱሲ ኦሶ አሲኔ ማታ አዋ ገዲዲ ሸቁሰ። ኢያ ማታይ ኢያ ቲሚርቲያን፣ ቱና አያና ቦላ ደዒያ ዋልቃኒኔ አሳ ናጋራፔ ማሬይሳን ቆንጨሰ። ዩሱሲ፣ «ታኒ፣ አሳ ናጋራ አይሌቴላፊ ኬሳናው ታ ዴዑዋ አላዳ ኢማናው ዩዳ አሳ ናዓ» ያጊዲ ባ ዶናን ሃሳዪሰ።

ማርቆስ ዩሱፍ ታሪኪያ ሱሬ ኦንኒኔ ዋልቁ ኩሚዳ ኦንኒ ኦዲሰ። ማርቆስ ዩሱፍ ቃላኔ ቲሚርቲያ ገደናሽን ኢ አላዳ ማላሊሲያ ኦሶታ ባይራዩዲ ኦዳሰ። ማርቆስ ፃማቂያ ዮሃኒስ ታሪኪያ፣ ዩሱፍ ደንቃቲያኔ ኢያ ፓጩቴላ ቃንላን ኦዲ ሲሚዲ፣ ዩሱፍ ቲሚርቲያኔ ኢያ ፓሱዋ ዳልጊሲዲ ኦዳሰ። አቂ አቂ ቢሽን ዩሱፍ ታማሬቲ ዩሱፍ ሎይሊዲ ኤሪ ኤሪ ቢዶሶና፣ ሽን ዩሱፍ ኢዳይሳቲ አላዲ ኢዳሽ ኢዳሽ ቢዶሶና። ዉርሱላ ሽምፖቲ ዩሱፍ ዴዖን ዉርሱላ ሳሚንታን ፖሌቲዳ ኦሶታባ ኦዶሶና። ሄሳቲካ ኢያ ካቂቴላኔ ኢያ ዴንዲዋባ ኦዶሶና።

ማርቆስ ዋንጌላ ኣይፌ ቆፋታ

ዋንጌላ ደሜላ 1:1-13

ዩሱሲ ጋሊላን ባ ኦሱዋ ኦይኪዳይሳ 1:14-9:50

ዩሱሲ ዩሩሳላሚን ኦላዳ ኦሱዋ 10:1-52

ዉርሱላ ሳሚንታ ዩሩሳላሚ ሄራን 11:1-15:47

ዩሱፍ ሃይቆፔ ዴንዲዋ 16:1-8

ሃይቆፔ ዴንዲዳ ጎዳ ቆንጨላኔ ሳሎ ኬሳ 16:9-20

ፃማቂያ ዮሃኒሲ ኦን ጊጊሴሰ

(ማቶ 3:1-12፤ ሉቃ 3:1-18፤ ዮሃ 1:19-28)

1 ሃይሲ ያሳ ናዓ ዩሱስ ኪሪስቶስ ዋንጌላ ደሜላ።

2 ናቢያ ኢሳያሲ ፃፊዳ ማፃፋን ያሳይ፡

«ሄኮ፣ ታኒ ታ ኪታንቹዋ

ኔፔ ሲንሐ ዩዳና።

ኢ ኔ ኦጊያ ጊጊሳና።

3 ኢሶይ ባዘ ጊደን ባ ቃላ ቶቁ ኦሲዲ፥
 ረጎዳ ኦጊያ ገቢሲቲ፤
 ኢ ሃሙታና ሆርጋ
 ኢያው ሱሪሲቲ ገሰ »

ያገሰ።

4 ፃማቂያ የሃኒሲ አሳ ፃማቂሽ፥ «ሂንቴ ናጋራፔ ሰሚዲ ፃማቂቲቲ፤ ያሳይ ሂንቴ ናጋራ አቶ ጋና» ያገዲ ቃላ ኦዲሽ ባዘ ቢታፊ ዪሰ።

5 ዪሁዳ ቢታን ዳዒያ አሳይ ኡባይኔ ዬሩሳላሜ ካታማ አሳ ኡባይ የሃኒሳኮ የሶና። ባንታ ናጋራ ፓዲን፥ የሃኒሲ ኤንታ የርዳኖሴ ሻፋን ፃማቂሰ።

6 የሃኒሲ ገማሌ ኢኪሴፔ ዳዳቲዳ አፊላ ማዔሰ። ባ ያሳን ዳሮ ዳንጨሰ፤ ቃሲ ቦሌኔ ዳጌራ ኤሲ ሜሰ።

7 የሃኒሲ ቃላ ኦዲሽ፥ «ታፔ ጉዬራ ዳሮ ሚኔይሲ ዪሰ። ሃሪ አቶሺን፥ ታኒ ኢያ ጫማ ዋደሩዋ ሆካዳ ቢላናው ቤሲኬ።

8 ታኒ ሂንቴና ሃላን ፃማቂይሰ፥ ሺን ኢ ሂንቴና ጌሻ አያናን ፃማቂና» ያገሰ።

ዬሱሳ ፓጨቴሳ

(ማቶ 3:13-17፤ 4:1-11፤ ሉቃ 3:21-22፤ 4:1-13)

9 ዬሱሲ ሄ ዋዳ ጋሊላ ቢታን ዳዒያ ናዚሬቴ ካታማፔ ዪን፥ የሃኒሲ የርዳኖሴ ሻፋን ኢያ ፃማቂሰ።

10 ዬሱሲ ሃላፊ ኬያ ዋዳ ሳሎይ ዶዬቲን፥ ጌሻ አያናይ ባ ቦላ ሆሌዳ ዋዲሺን ቤዒሰ።

11 ቃሲ ሳሎፔ፥ «ታኒ ዶሲያ ታ ናዒይ ኔና፤ ታ ኔናን ኡፋይታይሰ» ያገያ ቃላይ ዪሰ።

12 ኢራ ጌሻ አያናይ ዬሱሳ ባዘ ቢታ ኤፊሰ።

13 ዬሱሲ ባዘ ቢታን ፃላሄን ፓጨቴሽ ኦይታሙ ጋላሰ ጋምዒሰ። ዶዒታራ ዳዒሰ፥ ሺን ከታንቸቲ ዪዲ ኢያ ማዲዶሶና።

ዬሱሲ ሞሎ ኦይኪያ ኦይዱ አሳታ ያገሰ

(ማቶ 4:12-22፤ ሉቃ 4:14-15፤ 5:1-11)

14 የሃኒሲ ቃሽቲዳፔ ጉዬ ዬሱሲ ያሳ ካዋቴሳ ዋንጌላ ኦዲሽ ጋሊላ ቢታ ቢሰ።

15 ያን፥ «ዋዳይ ጋኪሰ፤ ያሳ ካዋቴሳይ ማታቲሰ። ሂንቴ ናጋራፔ ሰሚዲ፥ ዋንጌላን ኦማኒቴ» ያገሰ።

1:3 ኢሳ 40:3 1:6 2ካዋ 1:8 1:11 ሜዴ 22:2፤ ማዘ 2:7፤ ኢሳ 42:1፤ ማቶ 3:17፤ 12:18፤ ማር 9:7፤ ሉቃ 3:22 1:15 ማቶ 3:2

16 ዩሱሲ ጋለላ አባ ማታራ አጲሼ፣ ሞሎ ኦይኪያ፣ ሲሞና ኢያ አሻ እንዲሪያሳ፣ ባንታ ጊቲያ አባን ዩጌይሳታ ቤዒስ።

17 ኤንታኮ፣ «ታና ካሊቲ፤ ታኒ ሂንቲና አሴ ኦይሉ ታማርሳና» ያጊስ።

18 ኤንቲ ሶሁዋራ ባንታ ጊቲያ ዩጌ አጊዲ ዩሱሳ ካሊዶሶና።

19 ዩሱሲ ጉሊ ሲንሴ ቢዲ፣ ናሞዑ አሻታ ዛብዲዮሳ ናይታ፣ ያይቆባኔ ዮሃንሳ ዋላሉዋ ጊዶን ባንታ ጊቲያ ጊሲይሳታ ቤዒስ።

20 ኢ ኤንታ ቤዒዳ ማላ ጃጊስ። ኤንቲ ባንታ አዋ ዛብዲዮሳ፣ ኢያ ኦሳንቸታራ ዋላሉዋ ጊዶን ዩጌ አጊዲ ዩሱሳ ካሊዲ ቢዶሶና።

**ቱና አያናይ ኦይኪዳ ኡራይ ፓጂስ
(ሉቃ 4:31-37)**

21 ኤንቲ ቁፊርናሆሜ ካታማ ጌሊዶሶና። ሳሞባቲ ጌሊዳ ማላ ዩሱሲ ኤሌሲዲ አይሁዳ ዋሳ ኬሌ ጌሊዲ ታማርሶ ኦይኪስ።

22 ማታራ ዳዒያ አሳዳ ታማርሴሲ፤ ኣቲን ሂጌ አስታማሬታላ ታማርሶና ጊሾ አሳይ ኢያ ቲሚርቲያን ማላሉቲዶሶና።

23 ሄ ዋዴ ቱና አያናይ ኦይኪዳ ኢሲ ኡራይ አይሁዳ ዋሳ ኬሌ ጌሊዲ ባ ቃላ ቆቁ ኦሊዲ፣

24 «ናዚሬቴ ዩሱሳ፣ ኔኒ ኑፔ አይ ኮያይ? ኑና ጳይሳናው ያዲ? ኔኒ ኦኔኮ ታ ኡራይስ፤ ኔኒ ፆሳ ጌሻ ጊዲኪ?» ያጊስ።

25 ዩሱሲ ሄ ቱና አያና፣ «ሃይዛ፣ ሃ አዲያፊ ኬያ» ጊዲ ኪቲስ።

26 ቱና አያናይ ኡራ ዳፌሬሊዲ፣ ዋሲዲ ኢያፔ ኬዩስ።

27 አሳይ ኡባይ ማላሉቲዲ፣ «ሃይሲ አይቤ? ሃ ኡራይ ባ ማታን ሃሪ አቶሺን ቱና አያናታካ ኪቲስ። ኤንቲ ኢያው ኪቲቶሶና፤ ሃይሲ አይቤ ኦራላ ቲሚርቲ?» ጊዲ፣ ባንታ ጊዶን ኢሶይ ኢሱዋ ኦይቸዶሶና።

28 ዩሱሳ ሱንላይ ኤሌሲዲ ጋለላ ቢታን ዳዒያ ሄራ ኡባን ኬዩስ።

**ዩሱሲ ዳር ሃርጋንቸታ ፓሊስ
(ማቶ 8:14-17፤ ሉቃ 4:38-41)**

29 ዩሱሲ አይሁዳ ዋሳ ኬላፌ ኬዩዲ፣ ያይቆባራኔ ዮሃንሳራ ሲሞና ሶኔ እንዲሪያሳ ሶ ቢስ።

30 ሲሞና ማቸ ኢያ ቆቆ ሚሻ ሃርጋዳ ዚንዲዳር ዩሱሲ ያ ጋኪያ ዋዴ ኢያው ኦዲዶሶና።

- 31 ኢ ኢኮ ሸቂዲ፥ ኢ ኩሺያ ኦይኪዲ፥ ኢዮ ዳንሉ ኤሲሰ።
ቆያይኔ ሚሻይ ኣገን ኢያ ኤንታ ሞካሱ።
- 32 ሃርጊዳ ኣሳ ኡባኔ ቱና ኣያናቲ ኦይኪዳ ኣሳ ኡባ ኦማርሲ
ኣዋይ ወሊዳፔ ጉዬ ኢያኮ ኤሂደሶና።
- 33 ካታማን ዳዒያ ኣሳ ኡባይ ሄ ኬላ ካሬ ሸቂደሶና።
- 34 ዩሱሲ ዲማ ዲማ ሃርጊን ኦይኬቲዳ ዳር ኣሳ ፓሊዲ፥
ዳር ቱና ኣያናታ ኬሲሰ። ኢ ኦኔኮ ቱና ኣያናቲ ኤሪዳ ጊሾ ኤንታ
ኦዲሶና ዲጊሰ።

ዩሱሲ ጋሊላን ታማርሲስ
(ሉቃ 4:42-44)

- 35 ዩሱሲ ዋንታ ጉራ ዳንዲዲ፥ ኣሲ ባይና ቤሲ ቢዲ፥ ያን
ያሳ ዋሲሰ።
- 36 ሲሞኒኔ ኢያራ ዳዔይሳቲ ኢያ ኮዩሽ ቢደሶና።
- 37 ኤንቲ ኢያ ዳሚዲ፥ «ኣሳይ ኡባይ ኔና ኮዩስ» ያጊደሶና።
- 38 ዩሱሲ ቃሲ ኤንታ፥ «ሄ ሄራን ዳዒያ ሃራ ካታማታ ዩጲቲ።
ታኒ ዩዳይ ዋንጌላ ኦዳናው ጊዲያ ጊሾ ያንካ ቃላ ኦዳናው
ቤሴስ» ያጊሰ።
- 39 ኣይሁዳ ዋሳ ኬላታን ቃላ ኦዲሼኔ ቱና ኣያናታ ኬሲሼ፥
ጋሊላ ቢታ ኡባን ዩዩሰ።

ዩሱሲ ባር ሃርጋንቹዋ ፓሊስ
(ማጥ 8:1-4፤ ሉቃ 5:12-17)

- 40 ባርይ ኦይኪዳ ኢሲ ኡራይ ዩሱሳኮ ዩዲ፥ ኢያ ሲንላን
ጉልባቲዲ፥ «ኔኒ ኮይኮ ታና ጌሻናው ዳንዳዓሳ» ያጊዲ ዋሲሰ።
- 41 ዩሱሲ ኢያው ቃጴቲዲ፥ ባ ኩሺያ ዩዲዲ ኢያ ቦቺዲ፥
«ታኒ ኮያይሰ፥ ጌያ» ያጊሰ።
- 42 ሰሁዋራ ባርይ ኡራ ዩዲን ኡራይ ፓዒሰ።
- 43 ዩሱሲ ኡራ ሚንሉ ናጊሲዲ ኬሲ ዩዲሰ።
- 44 ዩሱሲ ኢያ፥ «ኔና ኤራ፥ ሃይሳ ኦዳሰካ ኦደፓ። ሺን ባዳ
ኔ ኣሳቲላ ኣሃኔ ቤሳ፥ ኔኒ ሃዒ ጌሺ ጊዲዳይሳ ኣሳ ኤሪሳናው፥
ሙሴይ ከቲዳ ያርሹዋ ያርሻ» ያጊሰ።
- 45 ሺን ኡራይ ቢዲ፥ ጉታ ኡባን ኣሳ ኡባሰ ኦዲሰ። ሄሳ ጊሾ፥
ዩሱሲ ቆንጮ ኬዩዲ፥ ካታማ ጌላናው ዳንዳዒቤና። ሺን ኣሲ
ባይናሶን ጋያን ዳዒሰ፤ ቃሲ ኣሳይ ኡባ ቤሳፌ ኢያኮ ዮሶና።

2

ዩሱሲ ጉንዳ ኡራ ፓሊስ
(ማቶ 9:1-8፤ ሉቃ 5:17-26)

1 ጉላ ጋላሳፔ ጉዬ ዩሱሲ ቂፊርናሆሜ ሲሚዲ፣ ሶን ደዔስ ጊያ ኦዲይ ሲዔቲሰ።

2 አሳ ከላይ ኤኮና ኢዲን፣ ሃሪ አቶሺን ካሬይካ ፀማና ጋካናው ዳር አሳይ ሸቂን፣ ዩሱሲ ቃላ ታማርሲሰ።

3 ኦይዲ አሳቲ ኢሲ ጉንዳ ኡራ ቶኪዲ ኢያኮ ኤሂደሶና።

4 አሳይ ዳሪዳ ጊሾ ኡራ ዩሱሳኮ ሸሻናው ኤንታው ዳንዳዔቶና ኢዲን፣ ዩሱሲ ዳዒያ ገናራ ከላ ቃሪዲ፣ ካራ ቃዉዲ ኡራ ኢ ዚንዲዳ አልጋራ ዲጌ ዩዲዲ ዩሱሳ ሲንላን ዋዲሲደሶና።

5 ዩሱሲ ኤንታ አማኑዋ ቤዒዲ፣ ሄ ጉንዳ ኡራ፣ «ታ ናዓው፣ ኔ ናጋራይ አቶ ጌቲቲሰ» ያገሰ።

6 ሂጌ አሰታማሪታፔ ሄ ቤሳን ኡቲዳ ኢሶቲ ኢሶቲ ባንታ ዋዛና፣

7 «ላ ሃ ኡራይ ሃይሳ ሜላ ኢታባ ያሳ ቦላ አይስ ኦዴቲ? ያሳ ዓላላፔ አቲን ሃሪ ኦኒ ናጋራ አቶ ጋናው ዳንዳዒ?» ጊዲ ቆፒደሶና።

8 ኤንቲ ባንታ ዋዛናን ሄሳዳ ቆፒዳይሳ ዩሱሲ ሶሁዋራ ባ አያናን ኤሪዲ፣ ኤንታኮ፣ «ሂንቲ ሂንቲ ዋዛናን አይስ ሄሳዳ ቆፒቲ?»

9 ጉንዳ ኡራ፣ «ኔ ናጋራይ አቶ ጌቲቲሰ» ጌይሲ ማቴዬ? ዋይኮ፣ «ዳንዳ ኤቃዳ ኔ አልጋ ቶካዳ ባ» ጌይሲ ማቴ?

10 ሺን ታው፣ አሳ ናዓስ፣ ሳዓ ቦላ ናጋራ አቶ ጋናው ማቴ ዳዔይሳ ሂንቲ ኤራና ሜላ» ጊዲ ሄ ጉንዳ ኡራኮ።

11 «ኔና ጋይስ፣ ዳንዳ ኤቃዳ ኔ አልጋ ቶካዳ ኔ ሶ ባ» ያገሰ።

12 ኡራይ ኤሌሲ ዳንዲ ኤቂዲ፣ ባ አልጋ ቶኪዲ አሳ ኡባይ ቤዒሺን ቢሰ። አሳይ ኡባይ ማላሌቲዲ፣ «ኦኒ ሃይሳ ሜላ ማላሊሲያባ ቤዒ ኤሮኮ» ያገዲ ያሳ ጋላቲደሶና።

ዩሱሳ ሌዌ ያገሰ
(ማቶ 9:9-13፤ ሉቃ 5:27-32)

13 ዩሱሲ ቃሲ ጋሊላ አባ ደና ሲሚ ቢዲ፣ ባኮ ዪዳ አሳ ኡባ ታማርሲሰ።

14 ያራ አዲሹ፣ ኢልፊዮሳ ናዓ ሌዌ ጌቲቲይሲ ቃራፃ ቃንዲሲያ ቤሳን ኡቲዳይሳ ቤዒዲ፣ «ታና ካላ» ያገሰ። ሌዌይ ዳንዲ ኤቂዲ ኢያ ካሊሰ።

15 ዩሱሲ ካሌ ማናው ሌዌ ሶን ኡቲስ። ኢያ ካሊያ አሳይ ዳር ገዲያ ገሾ ቃራፃ ቃንዲሲያ ዳር አሳይኔ ናጋራንቸቲ ኢያራኔ ኢያ ታማሬታራ ኢሲፌ ኡቲዶሶና።

16 ሂጌ አስታማሬ ገዲዳ ኢሲ ኢሲ ፋሪሳዌቲ ዩሱሲ ናጋራንቸታራኔ ቃራፃ ቃንዲሴይሳታራ ካሌ ሚሺን ቤዒዲ፣ «ኢ አይስ ናጋራንቸታራኔ ቃራፃ ቃንዲሴይሳታራ ካሌ ሚ?» ያገዲ፣ ኢያ ታማሬታ ኦይቸዶሶና።

17 ዩሱሲ ኤንቲ ጌይሳ ሲዒዲ፣ «ሃርጋንቸታፔ ኦቲን ፓፃታስ አኪሜ ኮሼና። ታኒ ናጋራንቸታ ፃጋናው ያሲፔ ኦቲን ዲሎታ ፃጋናው ያቢኬ» ያገዲ ኤንታው ዛሪስ።

ጾማባ ኤራናው ሺቂዳ ኦይሻ
(ማቶ 9:14-17፤ ሉቃ 5:33-39)

18 ፃማቂያ ዮሃንሳ ታማሬቲኔ ፋሪሳዌቲ ጾሞሶና። ኢሲ ኢሲ አሳቲ ዩሱሳኮ ዪዲ፣ «ዮሃንሳ ታማሬቲኔ ፋሪሳዌታ ታማሬቲ ጾሞሶና፣ ሺን ኔ ታማሬቲ አይስ ጾሞኮና?» ያገደሶና።

19 ዩሱሲ ኤንታኮ፣ «ያጋኑዋ ዪዳ አሳቲ ማቸው ኤኬይሲ ኤንታራ ዴዒሺን፣ ጾማናው ዳንዳፃና? ማቸው ኤኬይሲ ኤንታራ ዴዒሺን፣ ጾማናው ዳንዳፃኮና።

20 ሺን ማቸው ኤኬይሲ ኤንታ ማታፔ ኤኬታና ዋዴይ ያና፣ ኤንቲ ሄ ዋዴ ጾማና።

21 «ጩጋ ማፃ ቦላ ኦራላ ዋሊዲ ሲኪያ አሲ ባዋ። ዋሊዲ ሲኪኮ፣ ኦራላይ ጩጋ ማዑዋ ዳኬስ፤ ዳኬላይካ ካሴይሳፌ ዳሬስ።

22 ቃሲ ማልዓንቶ ዋይኔ ጩጋ ኦጎርን ቆሊያ አሲ ባዋ። ሺን ቆሊኮ፣ ሄ ዋይኔይ ኦጎሩዋ ዳኬስ፣ ባዉካ ጉኬስ፣ ኦጎርይካ ኢቲስ። ሺን ማልዓንቶ ዋይኔይ ኦራላ ኦጎርን ቆሌቲስ» ያገሲ።

ሳምባታባ ኤራናው ሺቂዳ ኦይሻ
(ማቶ 12:1-8፤ ሉቃ 6:1-5)

23 ዩሱሲ ኢሲ ሳምባታ ጋላስ ባንጋ ጋዴ ገደራ ኦዲሺን፣ ኢያ ታማሬቲ ኢያራ ቢሼ ባንጋ ቲያ ሺርኪዲ ሞሶና።

24 ፋሪሳዌቲ ዩሱሳኮ፣ «ሄኮ፣ ኔ ታማሬቲ ሳምባታ ጋላስ ዋጋ ገደናባ አይስ ኦሶና?» ያገደሶና።

25 ዩሱሲ ኤንታኮ፣ «ዳዌቲይ ኮሻቲዲ፣ ሚያባ ኮዪዳ ዋዴ ባራ ዴዔይሳታራ ኦሊዳይሳ ናባቢቤኬቲ?»

26 አቢያታሪ ካሂኔ ሃላቃ ገዲዲ ዴዲያ ዋዴ ዳዊቲይ ያሳ ኬሌ ጌሊዲ፣ ካሂኔታ ፃላሊ ማናፔ ኣቲን ኦኒካ ማናው ዋጋ ገደናይሳ ጎዳ ሲንላን ዋሉዳ ዳቡዋ ሚስ፣ ባራ ዴዴይስታሰካ ኢሚስ» ያገሰ።

27 ቃሲካ ዬሱሲ ኤንታኮ፣ «ሳምባቲ ኣሳ ናዓ ጎዓስ ሜዴቲሲፔ ኣቲን ኣሲ ሳምባታሰ ሜዴቲቤና።

28 ሄሳ ገሾ፣ ኣሳ ናዓይ፣ ሃሪ ኣቶሺን ሳምባታሰካ ጎዳ» ያገሰ።

3

ዬሱሲ ኩሼ ጉንዳ ኡራ ፓሊስ
(ማቶ 12:9-14፤ ሉቃ 6:6-11)

1 ዬሱሲ ኣይሁዴ ዋሳ ኬሌ ሲሚ ጌሊስ። ያን ኩሼይ ጉንዲዳ ኢሲ ኡራይ ዴዴስ።

2 ኢሲ ኢሲ ኣሳይ ዬሱሳ ሞታናው ኮዪዲ፣ ኩሼይ ጉንዲዳ ኡራ ሳምባታ ጋላስ ኢ ፓሊኮኔ ኣገኮ ቤዓናው ኮዪዲ ሚንሊዲ ናጎሶና።

3 ዬሱሲ ኩሼይ ጉንዲዳ ኡራ፣ «ዴንዳ ኤቃዳ ሃ ሲንሌ ያ» ያገሰ።

4 ሄሳፌ ጉዬ፣ ኣሳኮ፣ «ሳምባታ ጋላስ ሎዖባ ኦሌይሲ ዋጌዬ ኢታባ ኦሌይሲ ዋጌ? ኣሳ ሸምፖ ኣሾዬ ወይኮ ዋጅ?» ያገዲ ኦይቺስ።

ሺን ኣሳይ ሲዒ ገሰ።

5 ዬሱሲ ሃንቁቲዲ፣ ኤንታ ዩሺ ኣሉ ያሊዲ፣ ኤንቲ ኦዲን ሲዖናይሳታ ገዲያ ገሾ ኤንታ ቦላ ዳሮ ኣዛኒስ። ሄ ኣዲያኮ፣ «ኔ ኩሺያ ፒዲ ኦላ» ያገሰ። ኡራይ ፒዲ ኦሊን ኢያ ኩሼይ ፓዒስ።

6 ኤሌሲዲ ፋሪሳዊቲ ኣይሁዴ ዋሳ ኬላፌ ካሪ ኬዩዲ፣ ዬሱሳ ዋቲ ዋጃኔኮ ማቁታናው ሄሮዲሳ ባጋታራ ኢሲ ሶ ሺቁደሶና።

ኣሳይ ዬሱሳኮ ሸቁደሶና

7 ዬሱሲ ባ ታማሬታራ ጋሊላ ኣባኮ ቢስ። ጋሊላፔኔ ዩሁዳፔ ዩዳ ዳሮ ኣሳይ ኢያ ካሊደሶና።

8 ቃሲካ ዬሩሳላሜፔ፣ ኢዲሚያሳፔ፣ ዮርዳኖሴ ሻፋ ፒንላፌ፣ ያሮሳ ካታማፔኔ ሲደና ካታማፔ ዬሱሲ ኦሊዳባ ሲዒዲ፣ ዳሮ ኣሳይ ኢያኮ ዩደሶና።

9 ኣሳ ዳሮቴላፌ ዴንደይሳን ኢያ ኡንዔሶና ሜላ ኢያ ታማሬቲ ዋጎሎ ኢያው ገሊሳና ሜላ ኪቲስ።

10 ዳር አሳ ኢ ፓሊዳ ጊሾ ሃርጊያ አሳ ኡባይ ኢያ ቦቻናው ሱጌቶሶና።

11 ቱና አያናይ ኦይኪዳ አሳቲ ኢያ ቤዒዳ ዎዴ ኢያ ሲንላን ኩንዲዲ፣ ባንታ ቃላ ጶቁ ኦሊዲ፣ «ኔኒ ያሳ ናዓ ጊዲኪ?» ያጎሶና።

12 ዬሱሲ ሄ ቱና አያናቲ ባናቴላ ኦዴሰካ ቆንጨሶና ማላ ኤንታ ማንሊዲ ሃንቁቲሰ።

ዬሱሲ ታማኔ ናምዑ ሃዋሬታ ዶሪሰ
(ማቶ 10:1-4፤ ሉቃ 6:12-16)

13 ዬሱሲ ዴሪያ ቦላ ኬዬዲ፣ ባ ኮዬዳ አሳታ ባኮ ያጊሰ፤ ኤንቲካ ኢያኮ ቢዶሶና።

14 ኤንቲ ባራ ዳና ማላኔ ቃላ ታማርሳና ማላ ታማኔ ናምዓታ ዶሪዲ፣ ኤንታ፣ «ሃዋሬታ» * ጊዲ ሱንሊሰ።

15 ቱና አያናታካ ኬሳና ማላ ኤንታው ማታ ኢሚሰ።

16 ኢ ዶሪዳ ታማኔ ናምዓቲ ሃይሳታ፣ ጳዲሮሳ ያጊዲ ሱንሊዳ ሲሞና፣

17 ቦዓኔርጌሰ (ዳዳ ዳኒያ አሳታ) ያጊዲ ሱንሊዳይሳታ፣ ዛብዲዮሳ ናይታ ያይቆባኔ ያይቆባ ኢሻ ዮሃንሳ፣

18 ኢንዲሪያሳ፣ ፊልጶሳ፣ ባርቶሎሚዮሳ፣ ማቶሳ፣ ቶማሳ፣ ኢልፊዮሳ ናዓ ያይቆባ፣ ታዲዮሳ፣ ባ ቢታሰ ሚሹቲያ ሲሞና፣

19 ዬሱሳ ኦሊ ኢሚዳ አሰቆርታ ዪሁዳ።

ዬሱሳኔ ቢዔልዜቡላ
(ማቶ 12:22-32፤ ሉቃ 11:14-23፤ 12:10)

20 ሃሳፌ ጉዬ፣ ዬሱሲ ሶ ቢሰ። ቃሲ ዳር አሳይ ሺቁን፣ ኢኔ ኢያ ታማሬቲ ሃሪ አቶሺን ካሊ ማናጫካ ዳንዳዒቦኮና።

21 አሳይ ኢያ፣ «ሳዬሰ» ጊያ ጊሾ ኢያ ዳቦቲ ሄሳ ሲዒዲ ኢያ ኤካናው ቢዶሶና።

22 ሂጌ አሰታማሬታፔ ኢሶቲ ኢሶቲ ዬሩሳላሜፔ ዪዲ፣ «ኢያ ቦላ ቢዔልዜቡሊ ዴዔሰ»፣ ኢ፣ «ፃላሄይ ዎልቃን ቱና አያናታ ኬሴሰ» ያጊዲ ኦዴቲዶሶና።

23 ዬሱሲ አሳ ባኮ ያጊዲ ለሚሶ ኦዲሰ። «ፃላሄይ ፃላሄ ዋቲ ኬሳናው ዳንዳዒ?»

24 ኢሲ ካዎቴላይ ባ ጊዶን ሻኬቲኮ ሄ ካዎቴላይ ኤቃናው ዳንዳዒና።

* 3:14 ሃዋሬ፣ ሃዋሬ ጉሳይ ኪቴቲዳይሳ ጉሱ። 3:22 ማቶ 9:34፤ 10:25

25 ሃሳዳካ፣ ኢሲ ከላ አሳይ ባንታ ገደን ሻኬተኮ ቆያናፔ አቲን ዳናው ዳንዳዎኮና።

26 ሂዛ፣ ፃላሄይ ባራ ካጩተዲ ሻኬተኮ ቆያናፔ አቲን ዳናው ዳንዳዎና።

27 «ሺን ኮይርተዲ ዎልቃማ ኡራ ቃቸና ዴዲሼ ኢያ ከላ ጌሊዲ፣ ኢያ ሚሺያ ቦንቃናው ዳንዳዎና ኢሲ ባዎ። ቃቸ ሲሚዲ ኢያ ከላ ቦንቃናው ዳንዳዎና።

28 «ታኒ ሂንቲው ቱማ ኦዳይስ፤ ያሳይ አሳ ናይታስ ናጋራ ኡባኔ ኤንቲ ጫያ ጫሼ ኡባ አቶ ጋና።

29 ሺን ጌሻ አያና ቦላ ኢታባ ኦይቲያ ኦይስካ ሜሪና ናጋራ ገዳናፔ አቲን ያሳይ ኡባራካ ኢያ ማሪና» ያገሰ።

30 ዩሱሲ ሃሳ ገዳይ፣ ኢሲ ኢሲ አሳቲ፣ «ኢያ ቦላ ቱና አያናይ ዴዎስ» ያገዳ ገሸሳ።

ዩሱሳ አዩጫ ኢያ ኢሻታ
(ማቶ 12:46-50፤ ሉቃ 8:19-21)

31 ኢያ አያኔ ኢያ ኢሻቲ ዩዲ ካሬን ኤቁዲ፣ ኢያኮ አሴ ከቲዲ ኢያ ያገደሶና።

32 ኢያ ማታን ኡቲዳ ዳር አሳቲ፣ «ሄኮ፣ ኔ አዩራኔ ኔ ኢሻታራ ካሬን ኤቁዲ ኔና ኮዮሶና» ያገደሶና።

33 ዩሱሲ ዛሪዲ፣ «ታ አያ ኦኔ? ቃሲ ታ ኢሻቲ ኦናንቲ?» ያገሰ።

34 ባ ማታን ኡቲዳ አሳ ዩሺ አላ ያለዲ፣ «ሄኮ፣ ታ አያኦኔ ታ ኢሻቲ ሃይሳታ።

35 ያሳይ ሼኒያ ኦላያ ኡባይ ታ ኢሻ፣ ታ ሚቸኔ ታ ኦዮ» ያገሰ።

4

ዜሬላ ዜሪያ ኡራ ሌሚሶ
(ማቶ 13:1-9፤ ሉቃ 8:4-8)

1 ዩሱሲ ዛሪዲ ጋሊላ አባ ማታን ታማርሴስ። ዳር አሳይ ኢያ ዩሹዋን ሸቁን፣ አባን ዴዲያ ዎሳሉዋ ገደ ጌሊዲ ኡቲስ፣ አሳ ኡባይ አባ ማታን ዴዎስ።

2 ኢ ኤንታ ዳርባ ሌሚሶን ታማርሴስ። ታማርሴሼ ሃይሳዳ ያገሰ።

3 «ሲዲቲ! ኢሲ ኡራይ ዜሬላ ዜሪናው ከዩስ።

4 ኢ ዘሪሸን፣ ኢሲ ኢሲ ዜሬላይ ኦጌ ጋፃን ዋጂስ፤ ካፎቲ ዪዲ ሚደሶና።

5 ኢሲ ኢሲ ዜሬላይ ጋርሳን ሻሎይ ዳዒያ ቢታ ቦላ ዋጂስ። ዳር ቢቲ ባይና ጊሾ ሄ ዜሬላይ ኤሌሲዲ ደሊስ።

6 ሺን ኣዊ ከዪዳ ዋዴ ሹሊስ። ሎይሊዲ ፃጶ ዬዲቦና ጊሾ ኤሌሲ ሚሊስ።

7 ኢሲ ኢሲ ዜሬላይ ኣጉንላ ጊደን ዋጂስ። ደሊዳይሳ ኣጉንላይ ዲጪዲ ጩሊዳ ጊሾ ኣይፌ ኣይፎና ኣቲስ።

8 ኢሲ ኢሲ ዜሬላይ ኣራዳ ቢታን ዋጂዲ ደሊስ። ዲጪዲ ኢሶይ ሃሰታማ፣ ኢሶይ ኡሱፑን ታማ ኢሶይ ጃታ ኣይፊስ» ያጊስ።

9 «ሲዒያ ሃይሊ ዳዒያ ኦኒካ ሲፆ» ያጊስ።

ዮሱሲ ለሚሶን ኦዲዳ ጋሱዋ

(ማቶ 13:10-17፤ ሉቃ 8:9-10)

10 ዮሱሲ ኦዲዳይሳ ሲዒዳ ኢሲ ኢሲ ኣሳቲኔ ታማኔ ናምቡ ታማሬቲ ዮሱሲ ባርካ ዳዒሸን፣ ኢያኮ ሸቂዲ ሄ ለሚሱዋ ቢርሼላ ኦይቺደሶና።

11 ዮሱሲ ኤንታኮ ሃይሳዳ ያጊስ፡ «ሂንቴው ያሳ ካዋቲላ ፀራ ኤርይ ኣሜቲስ። ሺን ሃራታስ ካዋቲላፊ ካሬን ዳዒይሳታስ ኡባባይ ለሚሶን ኦዴቲስ።

12 ጋሶይካ፣

ከንቲ ጃሎሶና፣ ሺን ዳሞኮና።

ሲፆሶና፣ ሺን ኣኬኮኮና።

ኤንቲ ዳሚያኮኔ ኣኬኪያኮ፣

ያሳኮ ሲማና

ኢካ ኤንታ ማራናሺን» »

ያጊስ።

ዜሬላ ለሚሱዋ ቢርሼላ

(ማቶ 13:18-23፤ ሉቃ 8:11-15)

13 ዮሱሲ ኤንታኮ፣ «ሃ ለሚሶይ ሂንቴው ጌሌኔ? ያቲን፣ ለሚሶ ኡባ ሂንቴ ዋቲ ኣኬካኔ?

14 ዜሬይሲ ያሳ ቃላ ዜሬስ።

15 ቃላይ ዜሬቲያ ዋዴ ኦጌ ጋፃን ዋጂዳይሳቲ ቃላ ሲዒዳይሳታ። ሺን ፃላሄይ ሶሁዋራ ዪዲ፣ ኤንታ ዋዛናን ዜሬቲዳ ቃላ ማጂ ዲጌስ።

16 ሄሳዳካ፣ ጋርሳን ሻሎይ ዳዒያ ቢታን ዜሬቲዳይሲ ቃላ ሲዒዲ፣ ኤሌሲዲ ኡፋይሳን ኤኬይሳ።

4:12 ኢሳ 6:9

17 ሺን ኤንታው ሚኖ ፃጾይ ባይና ጊሾ ሃዲሳፌ አቲን ገምግሞና። ጉላ ዋይፔ ጉዬ ቃላ ጋሶን ዋይይ ዋይኮ ጎዲ ጋኪያ ዋይ ኤሌሲዲ ቆቤቶሶና።

18 አጉንላ ጊደን ዜሬቲዳይሲ ቃላ ሲዔይሳታ።

19 ሺን ሃ ሳዓ ዴዑዋሰ ሂርጎይ፣ ዲሬቴላ ደሶይኔ ሃራባ አዋቲይሲ ኢያ ዋዛናን ጌሊዲ ቃላ ጩሊያ ጊሾ ኣይፌ ኣይፎና አቲሰ።

20 ሺን አራዳ ቢታን ዜሬቲዳይሳቲ ቃላ ሲዒዲ ኤኬይሳታ። ኤንቲ ኢሶይ ሃሰታማ፣ ኢሶይ ኡሱፑን ታማ ኢሶይ ፃታ ኣይፊሰን ያገሰ።

ጌማን ዴዒያ የምፔ (ሉቃ 8:16-18)

21 ዬሱሲ ጉጂዲ፣ «የምፔ ኤኪዲ፣ ዳቾፌ ዋይኮ ኣልጋፌ ጋርሳን ዋሊያ ኣሲ ዴዒ? ቶቃ ቤሳን ዋሌኔዬ?

22 ሂዛ፣ ቆሴቲዳባይ ኡባይ ቆንጩ ኬያና፤ ጌሚዳባይ ኡባይ ኤሬቶና አቲና።

23 ሲዒያ ሃይሊ ዴዒያ ኣኒካ ሲያ» ያገሰ።

24 ቃሲ ኤንታኮ፣ «ሂንቲ ሲዒያባ ኣኬኪዲ ሲዒቲ! የሳ ቃላ ሂንቲ ሲዒይሳ ማላ ኢ ሂንቲው ኣኬካ ኢማና። ኡባካ ሂንቲው ዳርሲዲ ኢማና።

25 ኢሲባይ ዴዒያ ኡራሰ ጉጂ ኢሜታና፣ ባይናይሳፌ ሃሪ አቶሺን፣ ኢያው ዴዒያ ሄ ጉሊያካ ኤኬታና» ያገሰ።

ዲጪያ ዜሬላ ለሚሶ

26 ዬሱሲ ዛሪዲ፣ «የሳ ካዋቲላይ ባ ጋዴን ዜሬሊ ዜሪያ ኣሳ ማላ።

27 ሄ ኡራይ ቃማ ጲሰኬሰ፤ ዋንታ ዴንዴሰ። ኢ ባ ሁዒን ዋኒያኮ ኤሮና ዴዒሺን ሄ ዜሬላይ ደሊሲኔ ዲጩሰ።

28 ቢታይ ካላ ባርካ ኢሜሰ። ኮይሮ ደሊዲ ዲጩሰ፣ ካሊዲ ኣይፋናው ገምቡፃሰ፣ ዉርሴላን ኩሜላ ኣይፌ ኣይፊሰ።

29 ሺን ካላይ ጋኪያ ዋይ ኡራይ ሶሁዋራ ባጫራ ጌሊ ኣጌሰ» ያገሰ።

ኣይፌ ጉላ ሚላ ለሚሶ (ማቶ 13:31-34፤ ሉቃ 13:18-19)

4:21 ማቶ 5:15፤ ሉቃ 11:33 4:22 ማቶ 10:26፤ ሉቃ 12:2 4:25 ማቶ 13:12፤ 25:29፤ ሉቃ 19:26 4:29 ኢዩ 3:13

30 ዩሱሲ፡ «ኑኒ የሰ ሳ ካዎቲላ ኣይ ዳኔስ ጋኔ? ዎይኮ ኣይቤራ ሌሚሳኔ?»

31 የሰ ሳ ካዎቲላይ ኣይፌ ጉላ ሚሊ ዳኔስ። ሄ ሚላ ኣይፊያ ዜሪያ ዎዴ ሳዓን ዴዒያ ሚላ ኣይፌ ኡባፌ ጉዳስ።

32 ዜሪን ዶሊዲ ኣታኪልቲ ኡባፌ ገታቲስ፤ ዳሮ ዳሺ ዳዩስ። ካፎቲ ኢያ ታሺያ ቦላ ከዲዲ ኡታና ጋካናው ዳዩስ» ያገሰ።

33 ዩሱሲ ሃይሳ ሚላ ዳሮ ሌሚሶን ኣሳይ ኣከካናው ዳንዳዔይሳ ሚላ ቃላ ኦዲስ።

34 ኣሳስ ሌሚሶይ ባይና ኦዴና። ሺን ዩሱሲ ባ ታማሬታ ፃላላራ ዴዒያ ዎዴ ኤንታው ኡባባ ቢርሺዲ ኦዲስ።

ዩሱሲ ሆቢያ ሲዒ ኦሊስ
(ማቶ 8:23-27፤ ሉቃ 8:22-25)

35 ሄ ጋላስ ሳዓይ ኦማርሲን፡ ዩሱሲ ባ ታማሬታኮ፡ «ኣባፌ ሄፊንላ ፒኖስ» ያገሰ።

36 ኢያ ታማሬቲ ዳሮ ኣሳ ዩጊ ኣገዲ፡ ዩሱሲ ካሴ ጌሊ ኡቲዳ ዎኅሉዎን ጌሊዲ ዩሱሳ ባንታራ ኤፊዶሶና። ሃራ ዎኅሎቲካ ያን ዴያሶና።

37 ዎልቃማ ጎቲይ ዴንዲዲ፡ ሆቤይ ዎኅሉዎ ሾጪን፡ ኩማና ጋካናው ዎኅሉዎ ገዶ ሃላ ጌሊስ።

38 ሄ ዎዴ ዩሱሲ ዎኅሉዎን ጉዬ ባጋራ ቦርኮቲዲ ጳስኪስ። ኢያ ታማሬቲ ኢያ ዴንላዲ፡ «ኣስታማሪያው፡ ኑኒ ጳያ ዎዴ ኔ ሲዒ ጋዳ ጻላይ?» ያገደሶና።

39 ያቲን፡ ኢ ባርኪዲ ጎቲያ፡ «ሲዒ ጋ» ገዲ፡ ኣባካ፡ «ዎፑ ጋ» ገሰ። ጎቲይካ ሲዒ ገን ኡባባይ ዎፑ ገሰ።

40 ዩሱሲ ባ ታማሬታኮ፡ «ኣይስ ሃይሳዳ ባቤቲ? ሂንቴው ኣማኖይ ዋኒዲ ጳዩዴ?» ያገሰ።

41 ኤንቲ ዳሮ ባቢዲ ባንታ ገደን፡ «ሃይሲ ሃሪ ኣቶሺን፡ ጎቲይኔ ኣባይ ኪቴቲይሲ ኦኔ?» ያገደሶና።

5

ቱና ኣያኒ ኦይኪዳ ኡራይ ፓዲስ
(ማቶ 8:28-34፤ ሉቃ 8:26-39)

1 ዩሱሲኔ ኢያ ታማሬቲ ኣባ ፒኒዲ፡ ጌርጌሶኔ ገያ ቢታ ጋኪደሶና።

2 ዩሱሲ ዎኅሉዎፔ ዎጲያ ዎዴ ቱና ኣያናይ ኦይኪዳ ኢሲ ኡራይ ዳፎፔ ኬዩዲ ኢያራ ጋሂቲስ።

3 ሄ ኡራይ ዲፋዋን አቂ ፔሲዲ ዳዔስ። ኢያ ኦኒካ ሳንላላታን ቃቻናው ዳንዳዔና።

4 ኢ ዳር ቶሆ ዲላኒኔ ሳንላላታን ቃሹቲዲ ዳዔስ። ሺን ሳንላላታ ዲሴሬሴስ፣ ዲላ ሜንሴሬሴስ። ኢያ ቲቃናው ዳንዳዔያ ኦኒካ ባዎ።

5 ኢ ቃማኔ ጋላስ ሄ ዲፋዋኒኔ ዳሬ ቦላ ዋሴስ፣ ባ ቦላካ ሹቻን ጋራስ።

6 ዬሱሳ ሃሆን ቤዒዳ ዎዴ ዎዲ ቤዲ ኢያ ሲንላን ጉልባቲስ።

7 ሄ ኡራይ ባ ቃላ ቶቁ ኦሊዲ፣ «ኡባፌ ቦላ ያሳ ናዓው ዬሱሳ፣ ኔናኔ ታና አይቤ ጋሴይ? ታና ሳይሶና ሜላ ታኒ ኔና ያሳ ሱንላን ዎሳይስ» ያገሰ።

8 ኢ ሄሳ ጊዳይ ዬሱሲ ኢያ፣ «ላ ሃ ቱና አያናው፣ ሃ አዲያፌ ኬያ» ያገዳ ገሾሳ።

9 ዬሱሲ ኢያኮ፣ «ኔ ሱንላይ ኦኔ?» ያገዲ ኦይቺስ።

ኢ፣ «ኦኒ ዳር ጊዲያ ገሾ ታ ሱንላይ ለገዮና» ያገሰ።

10 ቱና አያናቲ ባንታና ሄ ቢታፌ ኬሲ ዬዶና ሜላ ዬሱሳ ሚንሱዲ ዎሲዶሶና።

11 ሄ ዳሪያ ቦላ ዳር ጉዲንሶ ዉዳይ ሃሙቱስ።

12 ቱና አያናቲ ዬሱሳኮ፣ «ኦና ሂኒ ጉዲንሶ ዉዲያኮ ዬዳርኪ፣ ኤንታን ቢዲ ጌሎስ» ያገዲ ዎሲዶሶና።

13 ዬሱሲ ኤንታኮ፣ «ቢቱ» ያገሰ። ያቲን ቱና አያናቲ አዲያፌ ኬዪዲ ጉዲንሶታን ጌሊዶሶና። ናሞፀ ሙኩሉ ጊዲያ ጉዲንሶ ዉዳይ አፎ ዶናራ ዲርገዲ ቢዲ አባን ጌሊዲ ሚቲቲዶሶና።

14 ጉዲንሶ ዉዲያ ሄሚይሳቲ ባቃቲ ቢዲ ሃኒዳባ ካታማኒኔ ጋፀሪያን ኦዲዶሶና። ያቲን አሳይ ሃኒዳባ ቤዓናው ኬዪዶሶና።

15 አሳይ ዬሱሳኮ ያ ዎዴ ቱና አያናን ኦይኬቲዳ ኡራ ቤዒዶሶና። ኢ ባ ዎዛናኮ ሲሚዲ፣ ማፖ ማዒዲ፣ ያን ኡቲዳይሳ ቤዒዳ ዎዴ ኡባይ ያዩዶሶና።

16 ሄሳ ቤዒዳ አሳቲ ቱና አያናቲ ኦይኪዳ ኡራ ቦላኔ ጉዲንሶታ ቦላ ሃኒዳባ ኡባ አሳስ ኦዲዶሶና።

17 ሄሳ ገሾ፣ አሳይ ባንታ ቢታፌ ዬሱሲ ባና ሜላ ዎሲዶሶና።

18 ዬሱሲ ዎጎሉዎን ጌሊያ ዎዴ ካሴ ቱና አያናይ ኦይኪዲ ዬዲዳ ኡራይ፣ ዬሱሳ ካላናው ኢያ ዎሲስ።

19 ሺን ዬሱሲ ኢዳዲ ኢያኮ፣ «ኔ ሶ ሲማዳ፣ ጎዳይ ኔው አይ ሜላ ገታባ ኦሊዳኮኔ ኔው አይ ሜላ ኬሂዳኮ ኔ ሶ አሳስ ኦዳ» ያገሰ።

20 ኡራይ ቢዲ ታሙ ካታማ ጊያሶን የዩዲ፥ ዩሱሲ ባው አይ ማላ ጊታባ ኦሊዲኮ ኦዲስ። ኢ ኦዲዲይሳ ሲዲዳ አሳ ኡባይ ማላሌቲዶሶና።

ሃይቂዳ ናዲዉኔ ዩሱሳ ማዑዋ ቦቺዳ ማጫሲው (ማቶ 9:18-26፤ ሉቃ 8:40-56)

21 ዩሱሲ ሲሚዲ፥ ዋሳሉዋን ጌሊዲ፥ አባ ፒኒዳፔ ጉዬ ዳር አሳይ አባ ጋፃን ኢያ ዩሹዋን ሸቂዶሶና።

22 ኢያሮሳ ጊያ አይሁዴ ዋሳ ኬላ ሃላቃታፔ ኢሶይ፥ ዩሱሳ ቤዲዳ ዋዴ ኢያኮ ዩዲ ኢያ ቶሁዋ ቦላ

23 ኩንዲዲ፥ «ታ ናዲያ ሃርጋዳ ሃይቃና ሃናውሱ። ኢያ ገፃዳ ዴዳና ማላ ያዳ ኔ ኩሺያ ኢ ቦላ ዋላርኪ» ያጊዲ ዩሱሳ ሚንሉዲ ዋሲስ።

24 ዩሱሲ ኢያሮሳራ ቢስ። ኢ ቢሺን ዳር አሳይ ኢያ ካሊዲ ኡንዔሊዶሶና።

25 ታማኔ ናምዑ ላይሊ ኢ ቦላፌ ሱሊ ጎጊያ ኢሲ ማጫሲያ ዴዳዉሱ።

26 ዳር አኪማቲ ኢዮ አኪሚዶሶና፥ ሺን ኢያ ገፃ ካዔታሱ። ኢያ ባ ሚሺያ ኡባ ዉርሲንካ ኢው ሃ ኢቲሰፔ ኣቲን አይኮካ ማዲቤና።

27 ሄ ማጫሲያ ዩሱሳባ ሲዳዳ፥ አሳ ካንላዳ ዩሱሳ ጉዬራ ያዳ ኢያ ማዑዋ ቦቻሱ።

28 ኢያ፥ «ታኒ ሃሪ አቶሺን ኢያ ማዑዋ ቦቺያኮ ገፃና» ጋዳ ቆገሱ።

29 ኢፔ ጎጊያ ሱላይ ሶሁዋራ ኤቂ አገሰ። ኢያ ባ ዋያፔ ገዲዲይሳ ባ አሳቲላን ኤራሱ።

30 ዩሱሲ ባፔ ዋልቂ ኬዩዲይሳ ባ ሁዔን ኤሪዲ፥ ኤሌሲዲ ዳር አሳ ጊዶን ጉዬ ሲሚዲ፥ «ታ ማዑዋ ቦቺዳይ ኦኔ?» ያገሰ።

31 ኢያ ታማሪቲ፥ «አሳይ ኔና ሱጌይሳ ቤዳሹ፥ «ዋይጋዳ ታና ኦኔ ቦቺዳይ ያጋይ?» » ያገደሶና።

32 ዩሱሲ ሄሳ ኦኒ ኦሊዲኮ ቤዳናው ዩሺ አሊ ዲሊስ።

33 ሺን ማጫሲያ ባው ሃኒዳባ ኤራዳ፥ ያሻን ኮኮራሽ ያዳ ዩሱሳ ሲንላን ጉፋናሱ፤ ቃሲ ሃኒዳባ ኡባ ቱማ ኢያው ኦዳሱ።

34 ያኒን፥ ዩሱሲ ኢኮ፥ «ታ ናቲ፥ ኔና ኔ አማኖይ ገሊስ፥ ሳርን ባ፥ ኔ ዋያፔካ ገፃ» ያገሰ።

35 ዩሱሲ ቡር ሃሳ ኦዲሺን፥ አይሁዴ ዋሳ ኬላ ሃላቃ ሶፔ ከቲቲዳ አሳቲ ዩዲ፥ «ኔ ናዲያ ሃይቃሱ፥ ኣስታማሪያ ኣይሰ ዳቡሪሳይ?» ያገደሶና።

36 ሺን ዩሱሲ ኤንቲ ጌይሳ ሲዒዲ፥ አይሁዴ ዋሳ ኩላ ሃላቃቱ፥ «አማኖ ፃላላ አማናፕ ኣቲን ባቦፋ» ያገሰ።

37 ዩሱሲ ጳጳርሳፕ፥ ያይቆባፕ፤ ያይቆባ ኢሻ ዮሃኒሳፕ ሃሪ ኦኒካ ባና ካሎና ማላ ዲጊሰ።

38 ኤንቲ አይሁዴ ዋሳ ኩላ ሃላቃ ሶ ጋኪያ ዋዴ ዩሱሲ አሳይ ካሃ ጳጳዲ ዩኬይሳኔ ዜሌሌይሳ ቤዒሰ።

39 ጌሊዲ አሳቱ፥ «አይሰ ካሃ ጳጳዲ ዩኬቲ? ናዒያ ጲሰካሱፕ ኣቲን ሃይቃቡኩ» ያገሰ።

40 አሳይ ኢያ ቦላ ማጨሰ። ሺን አሳ ኡባ ካሬ ኬሲዲ፥ ናዒ አዋ፥ አዪዉኔ ሄቩ ታማሬታ ባራ ኤኪዲ ናዒያ ዴዒያሱዋ ጌሊሰ።

41 ዩሱሲ ናዒ ኩሺያ ኦይኪዲ፥ «ፃሊታ፥ ቁሚ» (ጉላ ናቴ፥ ኔና ገይሰ ዴንዲ) ያገሰ።

42 ናዒያ ሶሁዋራ ዴንዳ ኤቃዳ ሃሙታሱ። ኢያ ታማኔ ናምዑ ላይላ ናዒ፥ ሄሳን አሳይ ዳሮ ማላሌቲዶሶና።

43 ዩሱሲ ሄሳ ኤንቲ ኦይሰካ ኦዶና ማላ ኤንታ ማንጺ ከቲሰ። ኤንቲ ኢው ሚያባ አማና ማላ ኦዲሰ።

6

ዩሱሲ ናዚሬቴን ኢፃቲሰ

(ማቶ 13:53-58፤ ሉቃ 4:16-30)

1 ዩሱሲ ያፕ ኬዪዲ፥ ባ ታማሬታ ካሌሊዲ፥ ባ ካታማ ናዚሬቴ ቢሰ።

2 ሳምባታ ጋላሰ አይሁዴ ዋሳ ኩላን ታማርሶ ኦይኪሰ። ኢ ታማርሴይሳ ሲዒዳ ዳሮ አሳይ ማላሌቲዲ፥ «ሃይሲ ሃ ኡባ አዉፕ ዴሚዴ? ሃ ጨንጫቴላ ኢ አዉፕ ኤኪዴ? ሃ ማላታታ ኦሊያ ማታ ኢ አዉፕ ዴሚዴ?

3 ሃይሲ አናፃያ ገዴኔ? ማይራሚ ናዒ፥ ያይቆባ፥ ዮሳ፥ ዪሁዳኔ ሲሞና ኢሻ ገዴኔዬ? ኢያ ሚቹቲ ኦራ ሃይሳን ዴዎኩናዬ?» ያገዲ፥ ኢ ገያባ ኤኮና ኢፃዶሶና።

4 ዩሱሲ ሄ አሳቱ፥ «ናቤይ ባ ቢታን፥ ባ ዳቦታኒኔ ባ ሶ አሳን ቦንቹቴናፊ ኣቲን ሃራታ ማታን ቦንቹቴሰ» ያገሰ።

5 ኢ ሄ ቤሳን ባ ኩሺያ ጉላ አሳ ቦላ ዋሊዲ ፓሊዳይሳፊ ኣቲን ሃራ ማላታታ ኦላናው ዳንዳዒቤና።

6 አሳይ አማኒቦና ገሾ ዳሮ ማላሌቲሰ።

ዩሱሲ ታማኔ ናምዑ ሃዋሬታ ከቲሰ

(ማቶ 10:5-15፤ ሉቃ 9:1-6)

ሄሳፌ ጉዬ፣ ዩሱሲ ሄ ሄራን ዳዒያ ጉታታን አሳ ታማርሴስ።
7 ዩሱሲ ታማኔ ናምዑ ታማራታ ባኮ ፀጊዲ፣ ናምዓ ናምዓ ጋሏዲ ከቲሰ። ኤንታው ቱና ኣያናታ ኬሲያ ዋልቃ ኢሚስ።

8 ኤንታ፣ «ኦጌ ፃምዓፌ አቲን ካሊ፣ ካርዒታ፣ ሂንቴ ከሴን ሚሼ ኣይቢባካ ኦይኮፊቴ።

9 ሂንቴ ቶሁዋን ጫማ ኣሊቴ፣ ሺን ናምዑ ኣፊላ ኦይኮፊቴ» ያገሰ።

10 ቃሲካ፣ «ሂንቴና ኣሲ ሞኪዳ ሶ አዉንካ ጊዲን ሄ ቤሳ ዩዲዲ ባና ጋካናው ሄ ኬሳን ጋምዒቴ።

11 ሂንቴና ኣሲ ሞኮናሱዋ ዋይኮ ሂንቴ ኦዲያባ ሲያናሱዋ አዉን ጊዲኮካ፣ ሄ ቢታን ዳዒያ ኣሳሰ ሄሲ ናጊሶ ማርካ ጊዲና ማላ ሄ ቤሳፌ ኬዩሼ፣ ሂንቴ ቶሁዋ፤ ባና ፒቲቴ» ያገሰ።

12 ታማኔ ናምዑ ታማራቲ ቢዲ፣ ኣሳይ ባንታ ናጋራፔ ሲማናዳ ቃላ ኦዲደሶና።

13 ኤንቲ ኣሳፔ ዳር ቱና ኣያናታ ኬሲደሶና። ዳር ሃርጋንቸታ ዛይቴ ቲዩዲ ፓሊደሶና።

ፃማቂያ ዮሃንሳ ሃይቁዋ
(ማቶ 14:1-12፤ ሉቃ 9:7-9)

14 ዩሱሳ ሱንሳይ ኡባ ቤሳን ኬዩዳ ጊሾ ካዋይ ሄርዲሲ ኢያባ ሲዒስ። ኢሲ ኢሲ ኣሳይ፣ «ፃማቂያ ዮሃንሲ ሃይቆፔ ዳንዲስ፣ ሄሳ ጊሾ ሃ ማላታታ ኦሌይ ኢያ» ያገደሶና።

15 ባጋቲ፣ «ሃይሲ ኤሊያሳ ጊዳኔ?» ያገደሶና።
ሃራቲ ቃሲ፣ «ሃይሲ ቤኒ ዋዴ ናቤታፕ ኢሱዋ ጊደና ኣጌና» ያገደሶና።

16 ሺን ሄርዲሲ ሄሳ ሲዒዳ ዋዴ «ሃይሲ ታኒ ቆጲያ ቃንዒሲዳ ፃማቂያ ዮሃንሳ ጊዳኔ? ኢ ሃይቆፔ ዳንዲስ» ያገሰ።

17 ሄርዲሲ ባ ኢሻ ፊልጶሳ ማቸው ሄርዲያዳ ኤኪዳ ጊሾ ኢ ጋሶን ዮሃንሳ ኦይሊዲ ቃሺሲስ።

18 ዮሃንሲ ሄርዲሳ፣ «ኔኒ ኔ ኢሻ ማቸው ኤካናው ቤሴና» ያገሰ።

19 ሄርዲያዳ ዮሃንሳ ባ ኡሎን ሞርካዳ ኢያ ዋጲሳናው ኮያሱ፣ ሺን ዳንዳቡኩ።

20 ዮሃንሲ ጂሎኔ ጌሻ ኣሲ ጊዲዳይሳ ሄርዲሲ ኤሪዳ ጊሾ ኢያው ባቢዲ ሎይሊ ናጊሴስ። ሄርዲሲ ዮሃንሲ ጊያባ ሲዒናው ደሲኮካ ኢ ጊያባ ሲዒያ ዋዴ ዳር ዳጋሚስ።

6:8 ሉቃ 10:4-11 6:11 ሃ.ኦ 13:51 6:13 ያይ 5:14 6:14 ማቶ 16:14፤ ማር 8:28፤ ሉቃ 9:19 6:18 ሉቃ 3:19-20

21 ሄሮዲሲ ባ ዬሌቲዳ ጋላሳ ቦንቻናው ዳሪያ ሃሪይሳታስ፡ ሻላቃታሲኔ ጋሊላን ዳዒያ ጌታ ኣሳሰ ኢማቶ ገቢሲስ። ሄሲ ሄሮዲያዳሰ ኢንጃ ጋላሰ ገዲሰ።

22 ሄሮዲያዳ ናዒያ ኢማላይ ሞኬቲያ ቤሳ ጌላ ዲራዳ፡ ሄሮዲሳኔ ኢያ ኢማላታ ኡፋይሳሱ። ካዎይ ናዒው፡ «ኔ ኮያባ ኣይባ ገዲኮካ ታና ኣይቻ፡ ታኒ ኔው ኢማና» ያገሰ።

23 ቃሲ ኢው ጫቂዲ፡ «ኔኒ ኦይቲያባ ኣይባ ገዲኮካ፡ ታኒ ኔው ኢማና። ሃሪ ኣቶሺን፡ ታ ካዎቴላ ባጋ ገዲኮካ ታኒ ኔው ኢማና» ያገሰ።

24 ናዒያ ካሬ ኬያዳ ባ ኣዬኮ፡ «ኣይ ኢማ ጎ?» ጋዳ ኦይቻሱ።

ኢ ኣያ፡ «ፃማቂያ ዮሃኒሳ ሁዒያ ኢማ ጋ» ያጋሱ።

25 ናዒያ ኤላሳዳ ካወዋኮ ባዳ፡ «ፃማቂያ ዮሃኒሳ ሁዒያ ሳኔን ዎላዳ ሃዒ ታው ኢማና ማላ ኮያይሰ» ያጋሱ።

26 ያኒን ካዎይ ዳሮ ቂሮቲስ፡ ሺን ባ ኢማላታ ገሾ ኢው ጫቂዳ ባ ጫቂዎ ማንላናው ኮዪቤና።

27 ሄሳ ገሾ፡ ኤሌሲዲ ናጌይሳ ዮሃኒሳ ሁዒያ ኤሃና ማላ ከቲስ። ናጌይሲ ቃሾ ከሌ ቢዲ ዮሃኒሳ ቆጂያ ቃንዲስ።

28 ሄ ቃንዲቲዳ ሁዒያ ሳኔን ዎላ ኤሂዲ ናዒሰ ኢማሰ። ናዒያ ቃሲ ባ ኣዬሰ ኢማሰ።

29 ዮሃኒሳ ታማሬቲ ሄሳ ሲዒዳ ዎዴ ቢዲ ኢያ ኣሃ ኤኪ ኤፊዲ ሞገደሶና።

ዬሱሲ ኢቻሹ ሙኩሉ ኣሳ ሙዚስ
(ማቶ 14:13-21፤ ሉቃ 9:10-17፤ ዮሃ 6:1-14)

30 ታማኔ ናምዑ ሃዎሬቲ ሲማ ዪዲ ኤንቲ ኦሊዳባኔ ታማርሲዳባ ኡባ ዬሱሳሰ ኦዲደሶና።

31 ኤንታኮ ያ ኣሳይኔ ቢያ ኣሳይ ዳሪዳ ገሾ ዬሱሳሳኔ ኢያ ታማሬታራ፡ ሃሪ ኣቶሺን ካሌ ማናዉካ ኤንታ ጋሉና ኢዲስ። ያኒን፡ ዬሱሲ ኤንታኮ፡ «ኦርካ ጉሌ ሸምፒ ኤካናው ኣሲ ባይና ቤሲ ዬጂቲ» ያገሰ።

32 ሄሳ ገሾ፡ ኤንቲ ባንታርካ ዎጎሎን ጌሊዲ ኣሲ ባይና ቤሲ ቢደሶና።

33 ኤንቲ ቢሺን ዳሮ ኣሳይ ኤንታ ቤዒዲ ኤሪደሶና። ያቲን፡ ካታማ ኡባፊ ኣሳይ ቶሆራ ዎዲ ቢዲ ኤንቲ ቢያሱዎ ኤንታፊ ሲንሌ ጋኪደሶና።

34 ዩሱሲ ዋጎሉዋፔ ዋጂዲ ዳር አሳ ቤዒስ። አሳይ ሄሚያ አሲ ባይና ደርሳ ማላ ጊዲዲይሳ ቤዒዲ ኤንታው ቃጭቲዲ ኤንታ ዳርባ ታማርሲስ።

35 ሳዒይ ኦማርሲያ ዋዴ ዩሱሳ ታማሬቲ ኢያኮ ዩዲ፣ «ሃይሲ ቤሳይ አሲ ባይና ቤሲ፤ ሃዒ ሳዒይካ ቃሚስ።

36 አሳይ ጉታታኔ ካታማታ ቢዲ ባንታው ሚያባ ሻማና ማላ አሳ ዩዳ» ያጊደሶና።

37 ሺን ዩሱሲ ዛሪዲ ኤንታኮ፣ «አሳስ ሚያባ ሂንቴ አሚቱ» ያጊሰ።

ኤንቲ፣ «ኮኒ ቢዲ ናምቡ ጭቱ ዲናሬን ኡይሉ ሻሚዲ አሳ ሙዛና ማላ ኮያይ?» ያጊዲ ኦይቺደሶና።

38 ዩሱሲ ኤንታኮ፣ «ሂንቴው አፑን ኡይሉ ዳዒ? ኣኔ ቢዲ ቤዒቲ» ያጊሰ።

ኤንቲ ቤዒዲ፣ «ኢቻሹ ኡይሉኔ ናምቡ ሞሎ» ያጊደሶና።

39 ዩሱሲ ባ ታማሬታ አሳ ኡባ ጩጋን ጩጋን ሻኪዲ ማታን ኡቲሳና ማላ ከቲስ።

40 አሳይ ባጋይ ጭታ፣ ባጋይ አሻታማ ጊዲዲ ጩጋን ጩጋን ሻኬቲዲ ኡቲደሶና።

41 ዩሱሲ ኢቻሹ ኡይላኔ ናምቡ ሞሎታ ኤኪዲ፣ ፑዴ ሳሎ ጃሊዲ ያሳ ጋላቲስ። ኡይላ ሚንሲዲ አሳስ ጊሻና ማላ ባ ታማሬታስ አሚስ። ቃሲ ናምቡ ሞሎታ ኤንታ ኡባስ ሻኪስ።

42 አሳ ኡባይ ሚዲ ካሊደሶና።

43 አቲዳ ኡይላ ቲፊያኔ ሞሎታ ቲፊያ፣ ኢያ ታማሬቲ ታማኔ ናምቡ ጋይታ ኩሜሉ ዳንሲደሶና።

44 ኡይላ ሚዳ ኣዴ አሳ ታይቦይ ኢቻሹ ሙኩሉ።

ዩሱሲ አባ ቦላራ ሃሙቲስ
(ማቶ 14:22-33፤ ዮሃ 6:15-21)

45 ኤሌሲዲ ዩሱሲ ባ ታማሬቲ ዋጎሉዋን ጌሊዲ፣ አባፌ ሄፊንላን ዳዒያ ቤቴሳይዳ ባፔ ሲንላቲዲ ባና ማላ ከቲስ። ሺን ባው አሳ ሞይዛናው ጉዬ ኣቲስ።

46 አሳ ሞይዚዳፔ ጉዬ ያሳ ዋሳናው ዳሪያ ቦላ ኮዩስ።

47 ሳዒይ ቃሚያ ዋዴ ዋጎሎይ አባ ጊደን ዳዔስ፣ ሺን ዩሱሲ አባፌ ጋፃን ባርካ ዳዔስ።

48 ጫርኮይ ኢያ ታማሬታኮ ጫርኪያ ጊሾ አባ ፒዶይ ዋይሴይሳ ዩሱሲ ቤዒስ። ዋንቲማጼ ሳዒይ ጌያና ሃኒያ ዋዴ ኢ አባ ቦላ ሃሙቲሼ ኤንታኮ ዩዲ፣ ኤንታ ዩጊዲ አቆናው ኮዩስ።

49 ሺን ኢ አባ ቦላ ሃሙቲሺን፣ ኤንቲ ቤዒዲ፣ ኤንታው ዋይቲሌ ዳኒን ዋሲዶሶና።

50 ኤንቲ ኡባይ ኢያ ቤዒዲ፣ ያሻን ኮኮሪዶሶና።

ሺን ዩሱሲ ኤሌሲዲ ኤንታኮ፣ «ታና፣ አይኮይ ባዋ፤ ያዮፊቲ» ያጊስ።

51 ዩሱሲ ዋጎሉዋን ጌሊዲ ኤንታራ ኢሲፌ ኡቲን ጫርኮይ ዋፑ ጊስ። ኤንቲ ዳር ማላሌቲዶሶና።

52 ኤንታ ዋዛናይ ዜልዑሚዳ ጊሾ ኤንቲ ኡይላባ አኬኪቦኮና።

ዩሱሲ ጌንሳሬዳን ሃርጋንቸታ ፓሊስ

(ማቶ 14:34-36)

53 ኤንቲ አባ ፒኒዲ፣ ጌንሳሬዳ ቢታ ጋኪዲ፣ ዋጎሉዋ ጋፃ ሺሺዲ ቃቺዶሶና።

54 ኤንቲ ዋጎሉዋፔ ዋዲያ ዋዴ አሳይ ኤሌሲዲ ዩሱሳ ኤሪዶሶና።

55 ኤንቲ ሄራን ዴዒያ ቢታ ኡባን ዋዳሬቲዲ ሃርጋንቸታ ሃላን ቶኪዲ፣ «ዩሱሲ ዴዒስ» ጊን ሲዒዳ ቤሳ ኤሂዶሶና።

56 አሳይ ኢ ቤዳ ሶ ኡባን፣ ጋፃሪያን ጊዲን፣ ካታማን፣ ዴዒያ ሃርጋንቸታ ዳባባ ኤፎሶና። ሃርጋንቸቲ ኢያ አፊላ ማጫራ ጊዲኮካ ቦቻና ማላ አሳይ ኢያ ዋሲዶሶና። ቦቺዳ ኡባይ ፓዒስ።

7

ቤኒ አዋታ ዋጋ

(ማቶ 15:1-9)

1 ዩሩሳላሜፔ ዩዳ ጉላ ፋሪሳዌቲኔ ሂጌ አስታማሬቲ ዩሱሳ ማታን ሺቂዶሶና።

2 ዩሱሳ ታማሬታፔ ኢሶቲ ኢሶቲ ጌያና ኩሺያን፣ ሄሲካ ኩሼ ሜጩቶና ካሊ ሜይሳታ ቤዒዶሶና።

3 ፋሪሳዌቲኔ አይሁዴ አሳ ኡባይ ባንታ አዋታ ዋጋሉ ባንታ ኩሺያ ሜጩቶና ሞኮና።

4 ሃሳዳካ፣ ኤንቲ ጊያፔ ሻሜቲዳባ ሜጩና ዴዒሼ ሞኮና። ቃሲ ኤንቲ ባንታ አዋታፔ ኤኪዳ ሃራ ዳር ዋጊ ዴዒስ፣ ሄሲካ ሲኒያ፣ ኬሪያ፣ ቢራታ ሚሼታኔ አርሳ ሜጩያ ዋጋ ናጌይሳ።

5 ፋሪሳዊቲኔ ሂጌ አስታማሪቲ ዬሱሳ፥ «ኔ ታማሪቲ አይስ አዋታ ዋጋ ማንሉዲ ባንታ ኩሺያ ማጩቶና ካሉ ዋና?» ያጌዲ ኦይቺዶሶና።

6 ዬሱሱ ኤንታኮ፥ «ኢሳያሲ ሂንቴና ጨቦታ፥ ሳይሲ አሳይ ታና ባ ኢንፃርሳ ፃላላን ቦንቺሰ፥

ሺን ኤንታ ዋዛናይ ታፔ ሃሆን ዴዔሰ።

7 አሲ ማዲያ ዋጋ ያሳ ሂጌ ዳኒሲዲ ታማርሲያ ጊሾ ኤንቲ ታና ማላ ጎይኖሶና) »

ጊዲ ፃፊዳይሲ ቱማ።

8 «ሂንቴ ያሳ ኪታ አጊዲ አሳ ዋጋ ማንሉዲ ናጌታ» ያጌሰ።

9 ቃሲካ ዬሱሱ፥ «ሂንቴ ሂንቴ ዋጋ ናጊዲ ያሳ ኪታ ዩጊ አጋናው ሎጾ ኦጌ ዴማዴታ።

10 ሙሴይ፥ ሳይ አዋኔ ኔ አዩው ቦንቻ)፥ ቃሲ ሳይ አዋኔ ባ አዩው ጫዩይሲ ሃይቃናው ቤሴሰ) ያጌሰ።

11 ሺን ኢሲ አሲ ባ አዋ ዋይኮ ባ አዩው ማዳናይሳ አጊዲ፥ ሳይሲ ያሳ ያርሾ) ጊኮ፥

12 ኢ ባ አዋ ዋይኮ ባ አዩው ማዶና ማላ አሴታ።

13 ሄሳዳካ፥ ሂንቴ ሃራታ ታማርሲዳ ሂንቴ ዋጋን ያሳ ቃላ ካዲዴታ። ሄሳ ማላ ሃራ ዳርባ አሴታ» ያጌሰ።

አሴ ቱኒሲያባታ
(ማቶ 15:10-20)

14 ዬሱሱ ዳር አሳ ቃሲካ ባኮ ጃጊዲ፥ «ኡባይ ታኒ ኦዴይሳ ሲዒቲኔ አኬከቲ።

15 አሳ ዋዛናፔ ኬያባይ አሴ ቱኒሴሲፔ አቲን ካሬፔ አሳ ኡሎ ጌሊዲ አሴ ቱኒሲያባይ አይቢካ ባዋ።

16 ሲዒያ ሃይሉ ዴዒያ ኦኒካ ሲጾ» ያጌሰ።

17 ዬሱሱ ዳር አሳ ዩጊ አጊዲ ሶ ጌሊን ኢያ ታማሪቲ ሄ ለማሱዋባ ኢያ ኦይቺዶሶና።

18 ኢ ኤንታኮ፥ «ሂንቴዉካ ቃሲ ጌሊቤኔ? ካሬፔ አሳ ዋዛናን ጌሊያባይ አይቢካ አሴ ቱኒሳናው ዳንዳያናይሳ አኬከቲ?

19 አይስ ጊኮ፥ ካሉ አሳ ኡሎ ጊዶ ጌሊዲ ካንሉዲ አዲሲፔ አቲን አሳ ዋዛና ጊዶ ጌሌና» ያጌሰ። ሄሳን ዬሱሱ ካሉ ኡባይ ጌሺ ጊዳይሳ ኤሪሲሰ።

20 ካሊዲካ፥ ዬሱሱ፥ «አሳ ቱኒሲያባይ አሳ ዋዛና ጊዶፊ ኬያባ።

7:6 አሳ 29:13 7:10 ኬሳ 20:12፤ ዛሬ 5:16፤ ኬሳ 21:17፤ ሉዌ 20:9

21 አሳ ዋዛና ጊደፊ ኬያባይ ኢታ ቆፋ፥ ላይማቴሉ፥ ካይሶ፥ አሴ ዋጾ፥ ላማ፥
 22 ኢታ አሞ፥ ኢታቴሉ፥ ጌኔ፥ ቃይፆ፥ ጨሞ፥ ቃናቴ፥ ጨሼ፥ ኦቶሮኔ ቦዛቴሉ።
 23 ሃ ኢታባይ ኡባይካ አሳ ዋዛና ጊደፊ ኬዩዲ አሴ ቱኒሴሰ» ያገሰ።

ኢሲ ማጫሴ አማኑዋ
 (ማቶ 15:21-28)

24 ዩሱሲ ያፔ ኬዩዲ፥ ሂሮሳ ካታማ ማታን ዴዒያ ቢታ ቢሰ። ኢ ኢሲ ኬሉ ገሊዲ ያን ዴዒያሳ ኦኒካ ኤራና ማላ ኮዩቤና። ሺን ቆሴተዲ ጋምዓናው ዳንዳዒቤና።
 25 ሺን ኢ ጉላ ናዒው ቱና ኣያናይ ኦይኪዳ ኢሲ ማጫሴያ ዩሱሳባ ሲዳዳ ኤሌሳ ኢያኮ ያዳ ኢያ ቶሁዋ ቦላ ኩንዳሱ።
 26 ኢያ ኣይሁዴ ማጫሴ ጊዲኩ፤ ኢያ ዩሌተዳይ ሲሮፊንቄ ጊያ ቢታና። ኢያ፥ ባ ናዒፔ ቱና ኣያና ኬሳና ማላ ዩሱሳ ዋሳሱ።
 27 ሺን ዩሱሲ ዛሪዲ፥ «ናይቲ ኮይሮተዲ ካላ ካሎ፤ ናይታ ካላ ኤኪዲ ካናታሰ ዩጌይሲ ሎ? ጊዴና» ያገሰ።
 28 ማጫሴያ ዛሪዳ፥ «ታ ጎዳው ሄሲ ቱማ፥ ሺን ጋይታ ማታን ዴዒያ ካናቲ ናይታፔ ዋጲያ ቲፊያ ሞሶና» ያጋሱ።
 29 ዩሱሲ ቃሲ ኢኮ፥ «ሃ ኔ ቃላ ጊሾ ኔ ሶ ባ፤ ቱና ኣያናይ ኔ ናዒፔ ኬይሰ» ያገሰ።
 30 ማጫሴያ ባ ሶ ቢያ ዋዴ ቱና ኣያናይ ኢፔ ኬዩን ሂፃን ዚንዒዳር ዴማሱ።

ዩሱሲ ቱሌኔ ሙሜ ኡራ ፓሊሰ

31 ዩሱሲ ሂሮሳ ካታማፔ ኬዩዲ፥ ሲደናራኔ ታሙ ካታማታ ጊያ ቢታራ ካንሲዲ ጋሊላ አባኮ ቢሰ።
 32 አሳይ ቱሌኔ ዋዩዲ ኦይቲያ አሲ ዩሱሳኮ ኤሂዲ፥ ባ ኩሺያ ኢያ ቦላ ዋላና ማላ ኢያ ዋሲዳሶና።
 33 ዩሱሲ ባርካ ሄ ኡራ ዳሮ አሳፔ ጋፃ ኬሲዲ፥ ባ ቢራጲያ ኢያ ሃይላን ዩዲሰ። ቃሲ ጨቲ፣ ጨቲዲ ኢያ ኢንፃርሳ ቦቲሰ።
 34 ሳሎ ፑዴ ያሊዲ፥ ቶኪ ሽምፕዲ፥ «ኤፍታህ» ገሰ። ቢርሽላይካ «ዶዩታ» ጉሱ።
 35 ኡራ ሃይላይ ኤሌሲዲ ዶዩቲሰ፥ ቃሽቲዳ ኢንፃርሳይካ ቢርሽቲሰ፥ ኡራይ ገሺዲ ኦይቲሰ።
 36 ዩሱሲ አሳኮ፥ «ሃይሳ ኦይሰካ ኦይፒቲ» ያገሰ። ሺን ኢ ዳሮ ማንሲዲ ኦይፒቲ ገን፥ አሳይ ኦዳ ያ ዳርሲሰ።

37 ሄሳ ሲጊዳ አሳ ኡባይ ዳሮ ማላሌቲዳ፤ «ኡባባ ኢ ሎይሌ ኦሌስ። ሃሪ አቶሺን፣ ቱሊያ ሲሴስ፣ ሙሚያ ኦዲሴስ» ያገደሶና።

8

ዩሱሲ ኦይዲ ሙኩሉ አሳ ሙዚስ
(ማቶ 15:32-39)

1 ጉላ ዋዌ ጉዬ፣ ዳሮ አሳይ ዩሱሳኮ ሸቂዶሶና። አሳስ ሚያባይ ቋዩን ዩሱሲ ባ ታማሪታ ባኮ ፀገዲ፤

2 «ሃ አሳይ ታራ ሄቩ ጋላስ ጋካናው ጋሞዲ፤ አይኮካ ሚያባ ዴሚቦና ጊሾ ታና አሳይ ቃጴሌስ።

3 ታኒ አሳ ኮሻራ ሶ ዩዲኮ አሳይ ቢሼ ኦጌን ዳቡሪዲ ኩንዳና፣ ባጋ አሳይ ሃሆሶፔ ዪደሶና» ያገደሶ።

4 ዩሱሳ ታማሪቲ ዛሪዲ፣ «ሃ ባዞ ቢታን ሃ አሳ ኡባ ሙዛናው ጊዲያ ካሌ ዴማናው ዳንዳዔይ ኦኔ?» ያገደሶና።

5 ዩሱሲ ኤንታኮ፣ «ሂንቴው አፑን ኡይሌ ዴዲ?» ያገዲ ኦይቺስ።

ኤንቲ ዛሪዲ፣ «ላፑን ኡይሌ ዴዔስ» ያገደሶና።

6 ዩሱሲ አሳይ ሳዒን ኡታና ሜላ ኪቲስ። ያቲዲ፣ ላፑን ኡይላ ኤኪዲ ያሳ ጋላቲ ሲሚዲ ሄ ኡይላ ሜንሊዲ፣ አሳስ ጊሻና ሜላ ባ ታማሪታስ ኢሚስ። ኢያ ታማሪቲ አሳስ ጊሸደሶና።

7 ኤንታው ቃሲ ጉላ ላፋ ሞሎቲ ዴፖሶና። ዩሱሲ ሄ ሞሎታ ጊሾ ያሳ ጋላቲዲ፣ አሳስ ጊሻና ሜላ ባ ታማሪታ ኪቲስ።

8 አሳይ ኡባይ ሚዲ ካሊደሶና። ኢያ ታማሪቲ አቲዳ ቲፊያ ላፑን ጋይታ ኩሜሌ ዴንሊደሶና።

9 ካላ ሚዳ አሳ ታይቦይ ኦይዲ ሙኩሉ ጊዳና። ሄሳፌ ጉዬ፣ ዩሱሲ አሳ ዩዲስ።

10 ኢ ቃሲ ባ ታማሪታራ ኤሌሲ ዋጎሎን ጌሊዲ ዳልማኑታ ጊያ ቢታ ቢስ።

ማላቲ ኦሴታና ሜላ ኦይቺደሶና
(ማቶ 16:1-4)

11 ፋሪሳዌቲ ዪዲ ዩሱሳ ፓጫናው ኮዪዲ፣ ሳሎፔ ባንታና ማላታ ቤሳና ሜላ ዩሱሳራ ፓላማ ኦይኪደሶና።

8:11 ማቶ 12:38፤ ሉቃ 11:16

12 ዩሱሲ ቶኪ ሸምፒዲ፡ «ሃ ዋዲያ አሳይ አይሰ ማላታ ኮዩ? ታኒ ሂንቴው ቱማ ኦዲይሰ፤ ሃ ዋዲያ አሳሰ አይ ማላቲካ ኢሜቴና» ያገሰ።

13 ኢ ኢንታ ያን ዩጊ አጊዲ ዛሪ ዋጎሎን ጌሊዲ አባፌ ሄፊንላ ፒኒሰ።

ፋሪሳዊታኔ ሄሮዲሳ ኢርሹዋ
(ማቶ 16:5-12)

14 ኢያ ታማራቴ ካላ ኤፋናይሳ ዶጊዶሶና፤ ኢንታው ዋጎሎዋ ጊዶን ኢሲ ኡይላፌ ሃሪ ባዋ።

15 ዩሱሲ ኢንታኮ፡ «ሂንቴና ኤሪቴ። ፋሪሳዊታ ኢርሹዋፊኔ ሄሮዲሳ ኢርሹዋፊ ናጌቴቴ» ያገዲ ከቴሰ።

16 ኤንቴ ባንታ ጊዶን፡ «ኢ ሃይሳ ጌይ ኑሰ ኡይላ ባይና ጊሾሳ» ያገደሶና።

17 ዩሱሲ ኢንቴ ጌይሳ ኤሪዲ ኢንታኮ፡ «ሂንቴው ኡይላ ባይና ጊሾ አይሰ ኦድቴ? ሃሩካ ኤሬኬቴ? ዋይኮ ኣኬኬኬቴ? ሂንቴ ዋዛናይ ዶጨዳ?»

18 ሂንቴው አይፊይ ዳዒሺን ቤዔኬቴ? ሃይላ ዳዒሺን ሲዔኬቴ? ሂንቴ ኣኬኬቴ?

19 ታኒ ኢቻሹ ኡይላ ኢቻሹ ሙኩሉ ኣሳሰ ባሊዳ ዋዳ ኣፑን ጋይታ ኩሜላ ቴፌ ዳንሊዳቴ?» ያገሰ።

ኤንቴካ፡ «ታማኔ ናምዑ ጋይታ ኩሜላ» ያገደሶና።

20 «ሃሳዳካ፡ ታኒ ሳፑን ኡይላ ኦይዲ ሙኩሉ ኣሳሰ ባሊዳ ዋዳ ኣፑን ጋይታ ኩሜላ ቴፌ ዳንሊዳቴ?» ያገሰ።

ኤንቴ፡ «ሳፑን ጋይታ ኩሜላ ዳንሊዳ» ያገደሶና።

21 ያቴን፡ «ሃሩካ ኣኬኬኬቴ?» ያገሰ።

ዩሱሲ ቤቴሳይዳን ኢሲ ቆቂያ ፓሊሰ

22 ኤንቴ ቤቴሳይዳ ካታማ ቢደሶና። ጉላ ኣሳቴ ቆቂ ኡራ ዩሱሳኮ ኤሂዲ ሄ ኡራ ቦቻና ማላ ኢያ ዋሲደሶና።

23 ዩሱሲ ቆቂ ኡራ ኩሺያ ኦይኪዲ ካታማፔ ጋፃ ኬሲሰ። ኢያ ኣይፊያን ጨቴዲ ባ ኩሺያ ኢያ ቦላ ዋሊዲ፡ «ኔው ኣይኮይ ቤንቴ?» ያገዲ ኦይቺሰ።

24 ኡራይ ቶቁ ጊዲ ያሊዲ፡ «ታው ኣሳይ ቤንቴሰ፡ ሺን ኣሳይ ሃሙቴሼ ማላ ዳኔሰ» ያገሰ።

8:12 ማቶ 12:39፤ ሉቃ 11:29 8:15 ሉቃ 12:1 8:18 ኤር 5:21፤ ሂዝ 12:2፤ ማር 4:12

25 ሃሳፌ ጉዬ፣ ዩሱሲ ዛሪዲ፣ ኡራ ኣይፊያን ባ ኩሺያ ዋሊሰ። ኡራይ ሎይሊ ዪሊሰ፣ ኢያ ኣይፊይ ፓዲሰ፣ ኡባባ ጌሺዲ ቤዲሰ።

26 ዩሱሲ ኣዲያኮ፣ «ኔ ሶ ባ፣ ሺን ጉታ ጌሎፓ» ያጊዲ ኪቲሰ።

ጳዊሮሳ ኣማኑዋኔ ማርካቴሳ

(ማቶ 16:13-20፤ ሉቃ 9:18-21)

27 ዩሱሲ ባ ታማሪታራ ቁሳሪያ ፊልጶሳ ማታን ዳዒያ ጉታ ቢሰ። ኤንቲ ቢሺን ኦጌ ቦላ ዩሱሲ፣ «ታና ኣሳይ ኦና ጎና?» ያጊዲ ባ ታማሪታ ኣይቺሰ።

28 ኢያ ታማሪቲ፣ «ኢሲ ኢሲ ኣሳይ ኔና፣ ሳማቂያ ዮሃንሳ) ጎሶና፤ ሃራቲ፣ (ኤሊያሳ ጎሶና) ቃሲ ሃራቲ፣ ሳቤታፔ ኢሱዋ) ጎሶና» ያጊዲሶና።

29 ዩሱሲ ኤንታኮ፣ «ያቲን ሂንቲ ታና ኦና ጌቲ?» ያጊዲ ኣይቺሰ።

ጳዊሮሲ፣ «ኔኒ ኪሪሰቶሳ» ያጊዲ ዛሪሰ።

30 ዩሱሲ፣ «ታባ ኦዳሰካ ኦዶፔቲ» ያጊዲ ኤንታ ኪቲሰ።

ዩሱሲ ባና ጋካና ሜቱዋኔ ዋያ ኦዲሰ

(ማቶ 16:21-28፤ ሉቃ 9:22-27)

31 ዩሱሲ ባ ታማሪታኮ፣ «ኣሳ ናዓይ፣ ዳሮ ሜቶ ኤካናው ቤሴሰ፤ ጨማቲ፣ ካሂኔ ሃላቃቲኔ ሂጌ ኣስታማሪቲ ኢያ ኢዓናው ቤሴሰ። ኤንቲ ኢያ ዋቆናውኔ ሄቩ ጋላሳፔ ጉዬ፣ ኢ ሃይቆፔ ዳንዳናው ቤሴሰ» ያጊዲ ኤንታ ታማርሲሰ።

32 ኢ ሃሳ ኤንታው ጌሺዲ ኦዲሰ። ጳዊሮሲ ኢያ ኢሲ ባጋ ዛሪዲ ሃንቁሰ።

33 ሺን ዩሱሲ ጉዬ ሰሚዲ፣ ባ ታማሪታ ዪሊዲ፣ ጳዊሮሳ ሃንቁቲዲ፣ «ሃ ዓላሂያው፣ ታፔ ሃካ። ኔኒ ኣሲ ደሲያባ ቆፓሳፔ ኣቲን ያሳይ ደሲያባ ቆፓካ» ያጊሰ።

ዩሱሳ ካሎይ ባና ካዶ ኣይቺሰ

(ማቶ 10:38-39፤ 16:24-28፤ ሉቃ 9:23-27፤ 14:26-27)

34 ቃሲካ ዩሱሲ ዳሮ ኣሳኔ ባ ታማሪታ ባኮ ያጊዲ፣ «ታና ካላናው ኮያ ኦኒካ ባና ካዶ፤ ባ ማስቃሊያ ቶኪዲ ታና ካሎ።

35 ባ ሺምፑዋ ኣሻናው ኮያ ኡራይ ቆይሳና። ሺን ታ ጊሾኔ ዋንጌላ ጊሾ ባ ሺምፑዋ ቆይሲያ ኡራይ ኣሻና።

36 ኢሲ ኣሲ ሳዓን ዴዒያ ኡባባ ባው ሺሺዲ፥ ባ ሺምጥዋ ዳይሲኮ ኢያ ኣይ ማዳኔ?

37 ኢሲ ኣሲ ባ ሺምጥዋ ዋዛናው ኣይ ኢማናው ዳንዳዒ?

38 ያሳ ኣማናና ሃ ኢታ ዩሌቴላን፥ ኢሲ ኣሲ ታናኒኔ ታ ቃላን ዩላቲኮ፥ ኣሳ ናዓይ፥ ቃሲ ባ ኣዋ ቦንቸን ጌሻ ኪታንቸታራ ያ ዋዴ ኢያን ዩላታና» ያጊሰ።

9

ዩሱሳ ማላይ ላሜቲሰ

(ማቶ 17:1-13፤ ሉቃ 9:28-36)

1 ዩሱሲ ኤንታኮ፥ «ታኒ ሂንቴው ቱማ ኦዳይስ፤ ያሳ ካዋቴላይ ዋልቃራ ዩይሳ ቤዖና ሃይቆና ኢሲ ኢሲ ኣሳቲ ሃይሳን ዴዖሶና» ያጊሰ።

2 ዩሱሲ ኡሱፑን ጋላሳፔ ጉዩ፥ ባራ ጳዒርሳ፥ ያይቆባኔ ዮሃኒሳ ኤኪዲ፥ ኤንታ ዓላላ ጌታ ዴሪያ ቦላ ኬሲዲ ኤንታ ሲንፋን ላሜቲሰ።

3 ኢያ ማዖይካ ጳሊስ፤ ሳዓን ማዖ ሜጪያ ኦኒካ ጌሻናው ዳንዳዖናይሳ ሜላ ዳር ቦዲሰ።

4 ሄ ሄዙ ታማሬቲ፥ ኤሊያሲኔ ሙሴይ ዩሱሳራ ኦዴቲሺን ቤዒደሶና።

5 ጳዒርሲ ዩሱሳ፥ «ኣስታማሪያው፥ ኦኒ ሃይሳን ዴዒይሲ ኦሰ ሎዖ፤ ኦ ሄዙ ሻቃራታ ኢሱዋ ኔው፥ ኢሱዋ ሙሴስ፥ ቃሲ ኢሱዋ ኤሊያሳሰ ሻቃራና» ያጊሰ።

6 ኢያራኔ ሃንኮታራ ዳር ያዪዳ ጊሾ ኢ ኣይ ጊያኮካ ኤሪቤና።

7 ሃሳፌ ጉዩ፥ ሻራይ ዩዲ ኤንታ ካሚን ሻራፔ፥ «ሃይሲ ታ ደሲያ፥ ታ ናዓ፥ ኢ ጌይሳ ሲዒቲ» ጊያ ቃላይ ዩሰ።

8 ኤሌሲዲ ኤንቲ ዩሺ ኣላ ያሊያ ዋዴ ዩሱሳፔ ኣቲን ሃራ ኦናካ ባንታ ማታን ቤዒቦኮና።

9 ኤንቲ ዴሪያፔ ዋዲሺን፥ ዩሱሲ ኤንታኮ፥ «ኣሳ ናዓይ፥ ሃይቆፔ ዴንዳና ጋካናው፥ ሂንቴ ቤዒዳባ ኦዴስካ ኦደፔፔ» ያጊዲ ኪቲሰ።

10 ኢ ኪቲዳይሳ ኤንቲ፥ «ኤር» ጊዲ፥ «ሃ ሃይቆፔ ዴንደ ጌይሲ ዋይጉሴ» ጊዲ፥ ባንታ ጊደን ኦዴቲደሶና።

11 ኤንቲ ዛሪዲ፥ «ሂጌ ኣስታማሬቲ፥ ኦኤሊያሲ ኮይርቲዲ ያናው ቤሴስ) ኣይሰ ጎና?» ያጊዲ ኦይቺደሶና።

9:2 2ጳዒ 1:17-18 9:7 ማቶ 3:17፤ ማር 1:11፤ ሉቃ 3:22 9:11 ሚል 4:5፤ ማቶ 11:14

12 ዩሱሲ ዛሪዲ «ኤሊያሲ ኮይርቲዲ ዩዲ፣ ኡባባ ገሊሴስ፤ ያቲን፣ ኣይስ ጌሻ ማፃፋይ፣ ሓሳ ናዓይ ዳር ዋዬታና ኢጃታና» ያገ ገዲ ኦይቸስ።

13 ሺን ታኒ ሂንቲው ኦዳይስ፤ ኤሊያሲ ዩስ፤ ቃሲ ኢያባይ ጌሻ ማፃፋን ፃፊቲዳይሳዳ፣ ኣሳይ ኢያ ቦላ ባንታ ኮዩዳባ ኦሊዶሶና» ያገሰ።

ዩሱሲ ቱና ኣያናይ ኦይኪዳ ናዓ ፓሊስ
(ማቶ 17:14-21፤ ሉቃ 9:37-43)

14 ዩሱሲ፣ ጳጳርሲ፣ ያይቆቤኔ ዮሃኒሲ ሃንኮ ኢያ ታማሬታኮ ሲሚዲ ያ ዋዬ ዳር ኣሳይ ኤንታ ዩሹዋን ኤቁዳይሳታኔ ሂጌ ኣስታማሬ ገዲዳ ጉፋ ኣሳቲ ኤንታራ ፓላማይሳ ቤዒዶሶና።

15 ሄ ዳር ኣሳይ ዩሱሳ ቤዒዳ ዋዬ ማላሌቲዲ፣ ኤሌሲዲ ኢያኮ ዋዲ ዩዲ፣ ኢያ ሳርሊዶሶና።

16 ዩሱሲ ባ ታማሬታኮ፣ «ኤንታራ ኣይ ፓላማቲ?» ያገዲ ኦይቸስ።

17 ሄ ዳር ኣሳ ገዶፊ ኢሲ ኡራይ ዛሪዲ፣ «ኣስታማሪያው፣ ታ ናዓ ቦላ ኦዴቴሊ ዲጊያ ቱና ኣያናይ ዳዒያ ገሾ ኢያ ኔኮ ኤካዳ ያሰ።

18 ሃ ቱና ኣያናይ ኢያ ኦይኪያ ዋዬ ኡባን፣ ኢያ ሾጪ ዩጌስ፤ ኢያ ዶናራ ጎፖንቶይ ዩስ፤ ቃሲ ኣቼ ጋርጪሴስ፤ ኣሳቴፋካ ሚኔስ። ኢያፔ ሃ ቱና ኣያና ኬሳና ማላ፣ ኔ ታማሬታስ ኦዳስ፣ ሺን ኬሳናው ዳንዳዒቦኮና» ያገሰ።

19 ዩሱሲ ዛሪዲ ኤንታኮ፣ «ኣማኖና ሃ ዋዲያ ኣሳው! ታኒ ሂንቲራ ኣዉዴ ጋካናው ዳኔ? ቃሲ ሂንቲና ኣዉዴ ጋካናው ዳንዳዒኔ? ናዓ ታኮ ሃ ኤኪ ዩቲ» ያገሰ።

20 ኤንቲ ናዓ ኢያኮ ኤሂዶሶና፤ ሄ ቱና ኣያናይ ዩሱሳ ቤዒዳ ማላ ናዓ ኮኮርሲስ፤ ናዓይ ሳዓን ኩንዲዲ፣ ዶናራ ጎፖንቶይ ቶፋ ገሺን ጎንዶሬቲስ።

21 ዩሱሲ ሄ ናዓ ኣዋኮ፣ «ሃይሲ ኔ ናዓ ኦይኮሳፔ ኣይ ማላ ዋዬ ገዳኔ?» ያገዲ ኦይቸስ።

ናዓ ኣዋይ፣ «ኢ ጉፋን ዳዒሺን ኦይኪስ።

22 ኢያ ዋዳናው ዳር ዋዬ ታማኒኔ ሃፋን ዩጌስ፣ ሺን ኔ ዳንዳዒኮ፣ ኮስ ቃጴታርኪ፣ ኑና ማዳርኪ» ያገሰ።

23 ዩሱሲ ኢያ፣ « ነኒ ዳንዳዒኮ ጋይ?» ኣማኒያ ኦዴሰካ ኡባባይ ዳንዳዒቲስ» ያገሰ።

24 ኤሌሲዲ ናዓ ኣዋይ ባ ቃላ ቶቁ ኦሊዲ፣ «ታኒ ኣማናይስ፣ ሺን ጉጃ ኣማናናዳ ታና ማዳርኪ» ያገሰ።

25 ዩሱሲ አሳይ ዳሪ ዳሪ ቤይሳ ቤዒዲ፣ ቱና አያና፣ «ሃ ቱሌኔ ሙሜ አያናው፣ ሃ ናዓፔ ኬያ ጋዳ ኔና ታ ኪታይስ፤ ቃሲ ናምዓንሉ ኢያን ጌሎፓ» ያገሰ።

26 ሄ ቱና አያናይ ዋሲዲ፣ ናዓ ዳሮ ኮኮርሲዲ፣ ኢያፔ ኬዩስ። ናዓይ ሃይቂዳ ዳኒን፣ ዳሮ አሳይ፣ «ናዓይ ሃይቂስ» ያገደሶና።

27 ሺን ዩሱሲ ናዓ ኩሺያ ኦይኪዲ ዴንሉን፣ ናዓይ ዴንዲ ኤቂስ።

28 ዩሱሲ ሶ ጌሊዳይሳፌ ጉዬ ኢያ ታማሬቲ፣ «ኦኒ ሄ ቱና አያና ኬሳናው አይስ ዳንዳዒቦኮ?» ያገዲ ዩሱሳ ዴማ ኦይቺደሶና።

29 ዩሱሲ ዛሪዲ፣ «ሄሳ ሜላይ ዋሳፔኔ ምማፔ ኣቲን ሃራባን ኬያናው ዳንዳዔና» ያገሰ።

ዩሱሲ ባና ጋካና ሜቱዋ ዛሪ ኦዲስ
(ማቶ 17:22-23፤ ሉቃ 9:43-45)

30 ኤንቲ ሄ ቤሳፌ ዴንዲዲ፣ ጋለላራ ኣቋዲ ቢደሶና፤ ዩሱሲ ባ ዴዒያሱዋ ኦኒካ ኤራና ሜላ ኮዩቤና።

31 ኢ ባ ታማሬታኮ፣ «ኣሳ ናዓ፣ ኣሲ ኣሳሰ ኣሉ ኢማናኔ ዋቆና፤ ኢ ሄቹ ጋላሳፔ ጉዬ፣ ሃይቆፔ ዴንዳና» ያገዲ ታማርሴስ።

32 ሺን ኤንታው ኢ ጌይሲ ጌሊቤና፤ ቃሲ ኢያ ኦይቻናወካ ያዩደሶና።

ኡባፌ ኣቋይ ኦኔ?
(ማቶ 18:1-5፤ ሉቃ 9:46-48)

33 ኤንቲ ቂፊርናሆሜ ካታማ ቢዲ ሶ ጌሊዳይሳፌ ጉዬ ዩሱሲ ኤንታኮ፣ «ኦጌን ኣይ ኦዴቲቲ?» ያገዲ ኦይቺሶ።

34 ሺን ኤንቲ፣ «ኦ ጊደን ኡባፌ ኣቆናይ ኦኔ?» ያገዲ ፓላሚዳ ጊሾ ሲዒ ገደሶና።

35 ዩሱሲ ኡቲዲ፣ ታማኔ ናምፁ ታማሬታ ጭገዲ፣ «ኦኒካ ሲንሌ ኣቆናው ኮይኮ፣ ኡባፌ ጉዬ ኣቋዲ፣ ኡባሰ ኣይሌ ገዳናው ቤሴስ» ያገሰ።

36 ኢሲ ጉላ ናዓ ኤኪዲ፣ ኤንታ ጊደን ኤሲስ፤ ሄ ጉላ ናዓ ኢዲሚዲ ኤንታኮ፣

37 «ሃይሳ ሜላ ጉላ ናይታፔ ኢሱዋ ታ ሱንላን ሞኪያ ኦኒካ ታና ሞኬስ፤ ቃሲ ታና ሞኪያ ኦኒካ ታና ከቲዳይሳካ ሞኬሲፔ ኣቲን ታ ፃላላ ሞኬና» ያገሰ።

9:34 ሉቃ 22:24 9:35 ማቶ 20:26 9:37 ማቶ 10:40፤ ሉቃ 10:16፤ ዮሃ 13:20

ኑና ኢየና ኡራይ ኑ ባጋ
(ሉቃ 9:49-50)

38 የሃረሲ፡ «አስታማሪያው፡ ኢሲ አሲ ኔ ሱንላን ቱና አያናታ ኬሲሺን ኑኒ ቤራዲ፡ ኑ ባጋ ጊዶና ጊሾ ኢያ ዲጊዳ» ያገሰ።

39 ሺን ዩሱሲ፡ «ኦኒካ ታ ሱንላን ያሳይ ኦሊያ ማላታታ ኦሊዲ፡ ኤሌሲዲ ታ ቦላ ኢታባ ኦዴታናው ዳንዳዔይ ባይና ጊሾ ዲጎፊቴ።

40 ኑባ ኢየና ኡራይ ኑ ባጋ።

41 ታኒ ሂንቴው ቱማ ኦዳይሰ፤ ሂንቴ ታይሳታ ጊዲያ ጊሾ ኦኒካ ሂንቴው ታ ሱንላን ሃሎ ሃላ ኡያናው ኢሚኮካ፡ ባ ዎይቱዎ ኤካና።

ናጋራን ፓጩቴላ
(ማቶ 18:6-9፤ ሉቃ 17:1-2)

42 «ታና አማኒያ ሃ ጉላታፔ ኢሱዋ ባሌሊያ ኦኒካ፡ ጋቻ ዎጋ ዎፃ ባ ቆጆን ቃቺዲ፡ አባን ዉሊያኮ ኢያው ሎዎ።

43-44 ኔ ኩሺይ ኔና ባሌሊኮ፡ ቃንፃ ሆላ። ኔኒ ናምዑ ኩሺራ ቶዶና ጋናሜ ታማን ዩጌቴይሳፊ፡ ዲፃ ኩሺራ ዴዑዋ ጌሎይ ኔው ሎዎ።

45-46 ኔ ቶሆይ ኔና ባሌሊኮ፡ ቃንፃ ሆላ። ኔኒ ናምዑ ቶሁዋራ ጋናሜ ታማን ዩጌቴይሳፊ፡ ዎቤ ጊዳዳ ዴዑዋ ጌሌይሲ ኔው ሎዎ።

47 ኔ አይፊይ ኔና ባሌሊኮ፡ ዎጫ ኬሳ ሆላ። ኔኒ ናምዑ አይፊያራ ጋናሜ ታማን ዩጌቴይሳፊ፡ ኢሲ አይፊያራ ያሳ ካዎቴላ ጌሌይሲ ኔው ሎዎ።

48 ያን ኤንታ ሚያ ጉፁኔይ ሃይቄና፡ ታማይካ ቶዔና።

49 «ያርሾይ ማጻኔን ጌዩይሳ ሜላ አሲ ኡባይ ታማን ሃርቄታና።

50 ማጻኔይ ሎዎ፡ ሺን ኢ ማልዶና ኢጻኮ፡ ዛሪዲ ዋቲ ማልዔላኔ? ሂንቴናን ማጻኔይ ዴዎ። ያኒዲ ኢሶይ ኢሱዋራ ሳርቴላን ዴዒቴ» ያገሰ።

10

ማቾ ዩዳናው ቤሴና
(ማቶ 19:1-2፤ ሉቃ 16:18)

9:40 ማቶ 12:30፤ ሉቃ 11:23 9:41 ማቶ 10:42 9:43-44 ማቶ 5:30
9:47 ማቶ 5:29 9:48 ኢሳ 66:24 9:50 ማቶ 5:13፤ ሉቃ 14:34

1 ዩሱሲ ሄሳፌ ዳንዲዲ፣ ዩሁዳ ቢታ ቢዲ ዮርዳኖሴ ሻፋ ፒኒስ። ዳሮ አሳይ ዛሪዲ ኢያኮ ሸቂን፣ ካሴይሳዳካ ሄ አሳ ታማርሲስ።

2 ኢሲ ኢሲ ፋሪሳዌቲ ፓጫናው ኮዩዲ ዩሱሳ፣ «ኢሲ አሲ ባ ማቺው ዩዳና ሜላ ሙሴ ሂጌይ ከቲ?» ያጊዲ ኢያ ኦይቺደሶና።

3 ኢ ዛሪዲ፣ «ሙሴይ ሂንቴና ዋይጊዲ ከቲዳ?» ያጊስ።

4 ኤንቲ፣ «ሙሴይ፣ ለኢሲ አሲ ባ ማቺስ እንጂ ዋርቃቲ ኢሚዲ ዩዳ) ጊስ» ያጊደሶና።

5 ዩሱሲ ዛሪዲ፣ ኤንታ «ሂንቴ ኦዲን ሲያናይሳታ ጊዲያ ጊሾ ሙሴይ ሃ ከታ ሂንቴው ፃፊስ።

6 ሸን ያሳይ ኮይሮ ሜዲያ ዋዴ አዳኔ ማጫ ኦሊዲ፣ ኤንታ ሜዲስ።

7 ሄሳ ጊሾ፣ ኢሲ አሲ ባ አዋኔ ባ አዩው አጊዲ፣ ባ ማቺራ ኢሲፌ ዳዔስ።

8 ኤንቲ ናምዳይ ኢሲ አሴ ጊደሶና፤ ሂዛፔ፣ ኤንቲ ኢሲ አሴ ጊደሶናፔ አቲን ናምቡ አሲ ጊደኮና።

9 ሄሳ ጊሾ፣ ያሳይ ኢሲፌ ቃቺዳይሳ አሲ ሻኮሮ» ያጊስ።

10 ኤንቲ ሶ ሲሚዳ ዋዴ ኢያ ታማሬቲ ሃ ኦዳባ ዩሱሳ ናምዳንሉ ኦይቺደሶና።

11 ዩሱሲ ኤንታኮ፣ «ባ ማቺው ዩዲዲ ሃራ ኤኪያ ኦኒካ ላይማቴስ።

12 ቃሲ ማጫሲያካ ባ አዚናፔ ኬያዳ ሃራ አዚና ጌሊኮ ላይማታዉሱ» ያጊስ።

ዩሱሲ ጉላ ናይታ እንጂስ
(ማቶ 19:13-15፤ ሉቃ 18:15-17)

13 ዩሱሲ ጉላ ናይታ ቦቻና ሜላ፣ ኢሲ ኢሲ አሳይ ናይታ ኢያኮ ኤሆሶና፣ ሸን ኢያ ታማሬቲ ሄ አሳ ሃንቄቲደሶና።

14 ዩሱሲ ሄሳ ቤዒዲ፣ ባ ታማሬታ ሃንቄቲዲ፤ ኤንታኮ፣ «ጉላ ናይቲ ታኮ ዩይሳ ዲሳፊቴ፤ ያሳ ካዋቴላይ ሃይሳታ ሜላሳ።

15 ታኒ ሂንቴው ቱማ ኦዳይስ፤ ያሳ ካዋቴላ ጉላ ናዓዳ ኤኮና ኡራይ ኦኒካ ሄ ካዋቴላ ኡባራካ ጌሌና» ያጊስ።

16 ጉላ ናይታ ኢዲሚዲ፣ ባ ኩሺያ ኤንታ ኢሱዋ ኢሱዋ ቦላ ዋሊዲ እንጂስ።

ሚሼ ሲቆይ ኤሂያ ማቱዋ
(ማቶ 19:16-30፤ ሉቃ 18:18-30)

17 ዬሱሲ ባናው ከዩዳ ዋዴ ኢሲ ኡራይ ዋዴ ዩዲ፥ ኢያ ሲንላን ጉልባቲዲ፥ «ኬሃ ኣስታማሪያው፥ ሜሪና ዴዑዋ ላታናው ታኒ ኣይ ኦሶ?» ያጊዲ ኦይቺሰ።

18 ዬሱሲ፥ «ኣይስ ታና ኬሃው ጋዳ ዪጋይ? ያሳ ፃላላፔ ኣቲን ሃሪ ኬሂ ኦኒካ ባዋ።

19 ያሳ ከታ፥ ዋጵፓ፤ ላይማቶፓ፤ ካይሶቶፓ፤ ዋርዶ ማርካቶፋ፤ ኢንፃርሳን ጨዋፋ፤ ኔ ኣዋኔ ኔ ኣዩው ቦንቻ ያጌይሳ ኡራሳ» ያጊሰ።

20 ኡራይ፥ «ኣስታማሪያው፥ ታኒ ሄሳ ኡባ ናዓቲላፌ ዶማዳ ሃዒ ጋካናው ናጋይሰ» ያጊሰ።

21 ዬሱሲ ኡራ ቲሺ ኦላ ዪሊዲ ዶሲስ፤ «ኔው ኢሲባይ ፓጩስ፤ ባዳ ኔው ዴዒያባ ኡባ ባይዛዳ፥ ሄ ሚሼያ ማንቆታስ ኢማ፤ ኔኒ ሳሎን ዴሬታና፥ ያታ ሲማዳ ታና ካላ» ያጊሰ።

22 ሺን ኡራይ ሄሳ ሲዒዲ፥ ኢ ዳሮ ዴሬ ጊዲያ ጊሾ ባ ሶምዑዋ ካሬሊስ፥ ኡፋይቶና ኣጊዲ ቢስ።

23 ዬሱሲ ባ ታማሪታ ዩሺ ኣላ ዪሊዲ፥ «ዴሬ ኣሲ ያሳ ካዋቴላ ጌላናይሲ ዋኒዲ ሜታንዴሻ!» ያጊሰ።

24 ኢያ ታማሪቲ ኢያ ቲሚርቲያ ሲዒዲ ማላሌቲዶሶና። ሺን ዬሱሲ ቃሲካ ኤንታኮ፥ «ናይቶ፥ ያሳ ካዋቴላ ጌላናይሲ ዋኒዲ ሜታንዴሻ!

25 ዴሬ ኣሲ ያሳ ካዋቴላ ጌላናይሳፌ፥ ጊማሌይ ናርፔ ለሆራ ኣጴይሲ ካዉዬስ» ያጊሰ።

26 ኢያ ታማሪቲ ማላሌቲዲ፥ «ያቲን፥ ኦኒ ኣታኔ?» ያጊዲ፥ ኢሶይ ኢሱዋ ኦይቺዶሶና።

27 ዬሱሲ ኤንታ ቲሺ ኦላ ዪሊዲ፥ «ሃይሲ ያሳሰ ዳንዳዔቴስ፤ ኣቲን ኣሳሰ ዳንዳዔቴና፤ ያሳሰ ኡባባይ ዳንዳዔቴስ» ያጊሰ።

28 ጳዒርሲ ዬሱሳኮ፥ «ሄኮ፤ ኦኒ ኦባ ኡባ ኣጊዲ፥ ኔና ካሊዳ» ያጊሰ።

29 ዬሱሲ «ታኒ ሃንቲው ቱማ ኦዳይስ፤ ታ ጊሾኔ ዋንጌላ ጊሾ ኬላ ዋይኮ ኢሻታ ዋይኮ ሚቼታ ዋይኮ ኣዋ ዋይኮ ኣዩው ዋይኮ ማቺው ዋይኮ ናይታ ዋይኮ ጋዲያ ኣጊዳይ ኦኒካ።

30 ሃዒ ሃ ዋዲያን ዪቲ ኩሼ ኬላ፥ ኢሻታ፥ ሚቼታ፥ ኣዬታ፥ ናይታ፥ ጋዲያ፥ ጎዴቲላራ ኢሲፌ ኤካና። ሲንላፌ ያና ዋዲያንካ ሜሪና ዴዑዋ ኤካና።

31 ሺን ዳርቲ ሃዒ ዳላን ሲንፌ ጊዲዳይሳቲ ጉዬ ጊዳና፣ ቃሲ ዳርቲ ሃዒ ጉዬ ጊዲዳይሳቲ ሲንፌ ጊዳና» ያገሰ።

ዩሱሲ ባና ጋካና ሜቱዋ ሄቸንፉ ኦዲስ
(ማቶ 20:17-19፤ ሉቃ 18:31-34)

32 ዩሱሳራኔ ኢያ ታማሬታራ ዩሩሳላሜ ቢሺን፣ ዩሱሲ ባ ታማሬታ ሲንፋን ሃሙቴሰ። ኤንቲ ማላሌቲዶሶና። ኢያ ካሌይሳቲካ ያዪዶሶና። ናምዓንፉ፣ ታማኔ ናምዑ ታማሬታ ጋዩ ኬሲዲ፣ ባና ጋካና ባ ዲማ ኤንታው ሃይሳዳ ያገዲ ኦዲስ።

33 «ሄኮ፣ ኑኒ ዩሩሳላሜ ሃዒ ኬዮሰ። ያን ኣሳ ናዓይ፣ ካሂኔ ሃላቃታሲኔ ሂጌ ኣስታማሬታሰ ኣሊ ኣሜታና። ኤንቲ ኢያ ቦላ ሃይቆ ፒርዳ ፒርዳና፤ ቃሲ ኣይሁዳ ጊደና ዳሪያሰ ኢያ ኣሊ ኢማና።

34 ሄ ኣይሁዳ ጊደና ዳሬይ ኢያ ቶቻና፣ ኢያ ቦላ ጩታና፣ ሊሶን ጋራፋናኔ ዋቋና። ኢ ሄቸ-ጋላሳፔ ጉዬ፣ ሃይቆፔ ዳንዳና» ያገሰ።

ያይቆቢኔ ዮሃንሲ ዋሲዳ ዋሳ
(ማቶ 20:20-28)

35 ዛብዲዮሳ ናይቲ ያይቆቢኔ ዮሃንሲ ዩሱሳኮ ዪዲ፣ «ኣስታማሬያው፣ ኑኒ ኔና ዋሲያ ኢሲባ ኑስ ኦፋርኪ» ያገደሶና።

36 ዩሱሲ ኤንታኮ፣ «ታኒ ሂንቴው ኣይ ኦሉ?» ያገሰ።

37 ኤንቲ፣ «ኔኒ ኔ ቦንቾ ካዋቴላን ኡቲያ ዋዴ ኑፔ ኢሱዋ ኡቫቻ ባጋራ ቃሲ ኢሱዋ ሃዲርሳ ባጋራ ኡቲሳርኪ» ያገደሶና።

38 ሺን ዩሱሲ ኤንታኮ፣ «ሂንቴ ኣይ ዋሲያኮ ኤሬኬታ፣ ታ ኡያናው ዳዒያ ፀዓ ኡያናው ዳንዳዔቲ? ቃሲ ታኒ ፃማቄታናው ዳዒያ ዲንቃቲያ ፃማቄታናው ዳንዳዔቲ?» ያገሰ።

39 ኤንቲ ዛሪዲ፣ «ኤ ዳንዳዎስ» ያገደሶና።

ዩሱሲ ቃሲ፣ «ቱማካ ታ ኡያናው ዳዒያ ፀዓ ሂንቴ ኡያና፣ ታኒ ፃማቄታናው ዳዒያ ዲንቃቲያ ሂንቴ ፃማቄታና።

40 ሺን ታፔ ኡቫቻ ባጋራኔ ሃዲርሳ ባጋራ ኡታናይሳታ ደራናው ታው ማቲ ባዋ፣ ሺን ሄ ቤሳይ ያሳይ ኢማናው ገሊሲ ዋሊዳይሳታሳ» ያገሰ።

41 ሃንኮ ታሙ ታማሬቲ ሄሳ ሲዒዳ ዋዴ ያይቆባኔ ዮሃንሳ ሃንቄቲዶሶና።

42 ዩሱስ ኤንታ ኡባ ባኮ ጭገዳ፣ «አይሁዳ ጊደና አሳ ሃላቃቲ ዳሪያ ሃሪይሳታ ጌቲቲዲ ጃጌቲይሳኔ ሃሪይሳታሰ ዳሪያ ቦላ ማቲ ዳዔይሳ ሂንቲ ኤሬታ።

43 ሺን ሂንቲ ጊደን ሄሳ ማላ ጊደና፤ ሂንቲ ጊደን ጌታታናው ኮዬይ ኦኒካ ሂንቲው አይሌ ጊደናው ቤሴሰ።

44 ቃሲ ሂንቲ ጊደን ኡባሬ ቦላ ጊደናው ኮዬይ ኦኒካ ሂንቲ ኡባሰ አይሌ ጊደናው ቤሴሰ።

45 ሃሪ አቶሺን፣ አሳ ናዓይካ፣ አሳሰ ኦላናውኔ ዳርታ ዋዛናው ባ ሺምቸዋ አሏ ኢማናው ዩሲፔ አቲን አሲ ኢያው ኦላና ማላ ዩቤና» ያገሰ።

ዩሱስ ቆቂያ ባርዲሞሳ አይፊያ ፓሊስ
(ማቶ 20:29-34፤ ሉቃ 18:35-43)

46 ኤንቲ ኢያርኮ ካታማ ቢደሶና። ዩሱስ ባ ታማሬታራኔ ዳሮ አሳራ ኢያርኮሬ ከዩሺን፣ ጂሞሳ ናዓይ፣ ቆቂይ፣ ባርዲሞሳ ጌቲቲይሰ፣ ኦጌ ጋፃን ዋሲሼ ኡቲሰ።

47 ባርዲሞሳ፣ ያራ አጼይ ናዘሬቲ ዩሱሳ ጊዲዳይሳ ሰዒዳ ዋዳ ባ ቃላ ቶቁ ኦሊዲ፣ «ዳዊቲ ናዓ ዩሱሳ፣ ታና ማራርኪ!» ያጉሱ ኦይኪሰ።

48 ዳሮ አሳይ ኢያ፣ «ሃይዛ!» ጊዲ ሃንቁቲደሶና።

ሺን፣ ኢ ባ ቃላ ካሴይሳሬ ዳሮ ቶቁ ኦሊዲ፣ «ዳዊቲ ናዓው፣ ታና ማራርኪ!» ያገሰ።

49 ዩሱስ ኤቂዲ፣ «ኢያ ሃ ጃጌቲ» ያገሰ።

ኤንቲ ቆቂያኮ፣ «አይኮይ ባዋ፣ ዳንዳ ኤቃ፣ ኔና ጃጌሰ» ያገደሶና።

50 ቆቂይ ባ ማዑዋ ሆሊ ዩጊዲ፣ ጉፒ ዳንዲ ኤቂዲ፣ ዩሱሳኮ ቢሰ።

51 ዩሱስ፣ «ታኒ ኔው አይ ኦላና ማላ ኮያይ?» ያገሰ።

ቆቂይ፣ «አስታማሪያው፣ ታ ጂላናው ኮያይሰ» ያገሰ።

52 ዩሱስ ኢያ፣ «ባ፣ ኔ አማኖይ ኔና ፓሊስ» ያገሰ። ሶሁዋራካ ኢያ አይፊይ ጃሊን፣ ዩሱሳ ካሊሰ።

11

ዩሱስ ጌታ ቦንቾን ዩሩሳሌም ጌሊስ
(ማቶ 21:1-11፤ ሉቃ 19:28-40፤ ዮሃ 12:12-19)

1 ኤንቲ ዩሩሳሌም ማቲሼ፡ ሻማሆ ዳሪያ ማታን ዳዒያ ቤቴፋጌኔ ቢታኒያ ካታማታ ጋኪደሶና። ዩሱሲ ባ ታማሬታፔ ናምዒታ ሲንፋ ከቲዲ።

2 «ሂንቴፊ ሲንፋን ዳዒያ ጉታ ቢቴ፤ ያ ጌሊዳ ማላ ኦኒካ ቶጊቦና ቃሾን ዳዒያ ሃሬ ማሪ ሂንቴ ዳማና፡ ኢያ ቢሊዲ፡ ሃ ኤኪ ዩቴ።

3 ኦኒካ ሂንቴና፡ «ሃይሳ ኣይሰ ኦፊቴ?» ያጊዲ ኦይቸኮ፡ ሳዳይ ኢያ ኮዩሰ፡ ኤሌሲዲ ሃ ዩዳና፡ ያጊቴ» ያጊሰ።

4 ኤንቲ ቢዲ፡ ሃሬ ማሪ ካሬ ቦላ ኦጌ ማታን ቃሾቴዲ ዳዒይሳ ዳሚዲ ቢሊደሶና።

5 ሄ ቤሳን ኤቂዳ ኢሲ ኢሲ ኣሳቲ ኤንታኮ፡ «ሃሬ ማራ ዋታናው ቢሊቴ?» ያጊደሶና።

6 ኢያ ታማሬቲ ዩሱሲ ባንታና ከቲዳይሳ ኦዲን፡ ኣሳቲ ዩዲ ኣጊደሶና።

7 ኤንቲ ሃሬ ማሪ ዩሱሳኮ ኤሂዲ፡ ባንታ ማዑዋ ኢያ ዘኮን ሃዲን ዩሱሲ ሄ ሃሬ ማሪ ቶጊሰ።

8 ዳሮ ኣሳይ ባንታ ማዑዋ ኦጊያን ሃዲደሶና፤ ቃሲ ሃራቲ ሚላ ታሼ ታሼዲ፡ ኦጊን ሃዲደሶና።

9 ዩሱሳፔ ሲንፋራ ሃሙቲያ ኣሳይኔ ኢያ ካሊያ ኣሳይ ባንታ ቃላ ቶቁ ኦሊዲ፡

«ሆሳና! * ያሳይ ጋላቴቶ! ጎዳ ሱንፋን ዩይሲ ኣንጄቲዳይሳ።

10 ጎዳ ሱንፋን ያ ኑ ኣዋ ዳዋቴ ካዎቴሳይ ኣንጄቲዳይሳ። ኡባፊ ቦላ ሳሉዋን ዳዒያ ያሳይ ጋላቴቶ»

ያጊደሶና።

11 ዩሱሲ ዩሩሳሌም ቢዲ፡ ያሳ ኮላ ጌሊሰ። ቃሲ ኡባባ ዩዩ ዪሊዳፔ ጉዩ፡ ሳዳይ ቃሚያ ጊሾ ታማኔ ናምዑ ታማሬታራ ቢታኒያ ካታማ ቢሰ።

ዩሱሲ ቃንጊዳ ባላሴ ሚሊው (ማቶ 21:18-19)

12 ዋንቴላ ጋላሰ ኤንቲ ቢታኒያፔ ኮዩዲ ቢሺን፡ ዩሱሲ ኮሻቲሰ።

13 ሃሆን ኢሲ ባላሴ ሚሊው ሃይላ ፃላላ ማዓ ኡቲዳሮ ቤዒዲ፡ ኢ ቦላ ኣይፊይ ቤቲኮ ጊዲ፡ ቤዓናው ኢኮ ቢሰ፡ ሺን

* 11:9 ሆሳና፡ ማቶ 21:9 ቤዒቴ። 11:9 ማዝ 118:25

ኢኮ ኢ ቢያ ዋዴ ሃይላ ፃላላፔ ኣቲን ኢሲ ኣይፊካ ዴሚቤና፤ ኣይሰ ገኩ፡ ባላሴይ ኣይፊያ ዋዴይ ጋኪቤና።

14 ዬሱሲ ሄ ባላሲው፡ «ሂዛ፡ ኔፔ ሚሪናው ኣሲ ኣይፊ ዋፕ» ያገሰ። ኢያ ታማሬቲ ኢ ጌይሳ ሲዒዶሶና።

ዬሱሲ ያሳ ኬላን ዛልዔይሳታ ኬሲሰ
(ማቶ 21:12-17፤ ሉቃ 19:45-48፤ ዮሃ 2:13-22)

15 ኤንቲ ዬሩሳሌሜ ቢዶሶና፤ ዬሱሲ ያሳ ኬላ ገሊዲ፡ ያን ባይዜይሳታኔ ሻሜይሳታ ካሬ ጎዶ ኦይኪሰ፤ ቃሲ ሚሾ ላሜይሳታ ፃርጳዛኔ ሆሌ ባይዜይሳታ ኦይዲያ ኣሉ ዬገዲ፡

16 ኣሲ ኣይቢባካ ቶኪዲ፡ ያሳ ኬላ ገደራ ኣጵና ሜላ ዲገሰ።

17 ዬሱሲ ኣሳ ሃይሳዳ ያገዲ ታማርሲሰ፡ «ጌሻ ማፃፋን፡ ታ ኬላይ ኣሲ ኡባይ ያሳ ዋሲያ ኬሉ ገዳና፤ ጌቴቲዲ ፃፊቲሰ። ሺን ሂንቴ ኢያ ፓንጋቲ ቆሴቲያ ጎንጎሎ ኦሉዴታ» ያገሰ።

18 ካሂኔ ሃላቃቲኔ ሂጌ ኣሰታማሬቲ ሃሳ ሲዒዲ፡ ኢያ ዋጳናው ኦጌ ኮሺ ኦይኪዶሶና። ሺን ዳር ኣሳይ ኢያ ቲሚርቲያን ማላሌቲያ ገሾ ኢያው ያዩዶሶና።

19 ሳባይ ኦማርሲያ ዋዴ ዬሱሲኔ ኢያ ታማሬቲ ካታማፔ ጋፃ ኬዩዶሶና።

ባላሴ ሚሊያ ሜላሱ
(ማቶ 21:20-22)

20 ኤንቲ ዋንቴላ ጋላሰ ሄ ኦጊያራ ኣጲሼ፡ ሄ ባላሲያ ፃጶራ ሚሊዳር ቤዒዶሶና።

21 ጳዒርሲ ኣኬኪዲ፡ «ኣሰታማሪያው፡ ሄኮ፡ ኔኒ ቃንገዲ ባላሲያ ሜላሱ» ያገሰ።

22 ዬሱሲ ዛሪዲ፡ «ያሳ ኣማኒቲ።

23 ታኒ ሂንቴው ቱማ ኦዳይሰ፤ ኦኒካ ባ ዋዛናን ሲጵና ገዳባይ ሃናናይሳ ኣማኒዲ፡ ሃ ዴሪያ፡ «ዴንዳዳ ኣባን ኩንዳ» ያገኩ ኢያው ሃናና።

24 ሄሳ ገሾ፡ ታኒ ሂንቴው ኦዳይሰ፤ ያሳ ሂንቴ ዋሲያባኔ ኦይቹያባ ኣይባ ገዲኮካ ኤኪዳዳ ኣማኒቲ፡ ሂንቴ ኤካና።

25 ያሳ ዋሳናው ሂንቴ ኤቂያ ዋዴ ሳሎን ዴዒያ ሂንቴ ኣዋይ ሂንቴ ናጋራ ኣቶ ጋና ሜላ፡ ኦኒካ ሂንቴና ናቂዳባይ ዴዒኮ፡ ኢያው ኣቶ ገቲ።

26 ሺን ኣሳ ናጋራ ሂንቴ ኣቶ ጎና ኢዲኮ፡ ሳሎን ዴዒያ ሂንቴ ኣዋይካ ሂንቴ ናጋራ ሂንቴው ኣቶ ጌና» ያገሰ።

ዩሱሲ አይቢ ማታን ኦሌያኮ ኦይሼቲስ
(ማቶ 21:23-27፤ ሉቃ 20:1-8)

27 ኤንቲ ዛሪዲ ዩሩሳሌሜ ቢደሶና። ዩሱሲ ያሳ ኬላን ሃሙቲሺን፣ ካሂኔ ሃላቃቲ፣ ሂጌ አስታማሬቲኔ ጨማቲ ኢያኮ ዩዲ።

28 «ኔኒ ሃይሳ ኦላናው ኔው አይ ማቲ ዴዒ? ዋይኮ ኔው ሃ ማታ ኢሚዲይ ኦኔ?» ያጊደሶና።

29 ዩሱሲ ዛሪዲ ኤንታኮ፣ «ታ ሂንቴና ኢሲባ ኦይቻና፣ ታው ኦዲቲ። ታ ቃሲ ሃይሳ አይ ማታን ኦሌያኮ፣ ሂንቴው ኦዳና።

30 ዮሃንሳ ዪንቃቴይ ያሳፊዬ ዋይኮ አሳፔ? ታው ኦዲቲ» ያጊሰ።

31 ኤንቲ ባንታ ጊደን ፓላማ ደሚዲ፣ «ኦኒ፣ (ያሳፊ) ጊኮ፣ ኢ ኦኮ፣ (ያቲን፣ ዮሃንሲ ኦዲዲይሳ አይሰ አማኒቤኬቲ?) ያጋና።

32 (አሳፔ ጊኮ) አሳ ኡባይ ዮሃንሲ ናቤ ጊዴይሳ ኤርሶና።» ያጊያ ጊሾ አሳሰ ያዩደሶና።

33 ሄሳ ጊሾ፣ ኤንቲ ዩሱሳኮ፣ «ኦኒ ኤርኮ» ያጊዲ ዛሪደሶና፤ ዩሱሲ፣ «ታኒካ ሃይሳ አይ ማታን ኦሌያኮ፣ ሂንቴው ኦዲኬ» ያጊሰ።

12

ዋይኔ ቶኪያ ጎሻንቸታ ሌሚሶ
(ማቶ 21:33-46፤ ሉቃ 20:9-19)

1 ዩሱሲ ኤንታው ሌሚሶን ያጊዲ ኦዲሰ፤ «ኢሲ ኡራይ ዋይኔ አታኪልቲ ቶኪዲ፣ ዩሺ አሉዲ ዲርሲ ዲሪሰ። ቃሲ ሄ ዋይኒያ ጉምዒያ ኦላካ ቦኪሰ። ኢያ ናጋናው አዲሳ ሻኮ ሻኪሰ። ሄሳፊ ጉዬ፣ ኮሌ ኦሌያ አሳሰ ኢሚዲ፣ ሃራ ቢታ ቢሰ።

2 ዋይኔ አይፊያ ማዲያ ዋዴይ ጋኪን፣ ባና ጋኬይሳ ኤኪዲ ያና ሜላ፣ ኢሲ ባ አይሊያ ኮሌ አዋታኮ ኪቲሰ።

3 ኮሌ አዋቲ ኢያ አይሊያ ኦይኪዲ ዋዲዲ፣ ሜላ ኩሾ ዩዲደሶና።

4 ናምባንሎ ሃራ አይሌ ኤንታኮ ኪቲን፣ ኤንቲ ሄ አይሊያሰ ሁዒያ ቆዒዲ ካዉሺዲ ዩዲደሶና።

5 ዋይኔ አታኪልቲያ ጎዳይ ቃሲካ ሃራ አይሌ ኪቲሰ። ሄ አይሊያ ዋዲደሶና፣ ቃሲ ሃራ ዳርታ ሄሳዳ ኦሌደሶና፣ ኢሶታ ኢሶታ ዋዲዲ፣ ሃራታ ዋዲደሶና።

12:1 ኢሳ 5:1

6 «ዎይኔ አታኪልቲያ ጎዳሰ ኪታናው ኡባፌ ወርሴላን ኢ ዳሮ ደሲያ ባ ናዓ ፃላሊ አቲሰ። ኢ፣ «ኤንቲ ታ ናዓ ቦንቸና አጎኮና» ጊዲ፣ ባ ናዓ ኤንታኮ ኪቲሰ።

7 «ሺን ኮሌ አዋቲ ባንታ ጊደን፣ «ላታናይሲ ሃይሳ፤ ዩቋቲ ኢያ ዎቋሰ፤ ኢያ ላታይ ኑባ ጊዳና!» ያጊደሶና።

8 ናዓ ኦይኪዲ ዎቋዲ፣ ኢያ እሃ ዎይኔ አታኪልቲያ ጊደፌ ጋፃ ኬሲ ሆሊደሶና።

9 «ሂዛ፣ ዎይኔ አታኪልቲያ ጎዳይ ዋታኔ? ዩዲ ሄ ኮሌ አዋታ ዎቋ ኦንጊዲ፣ ዎይኒያ ኮሌ ኦሊያ ሃራ አሳሰ ኢማና።

10-11 ገገምቤይሳቲ ቦሪዲ ኢዲዳ ሹቻይ

ጎዳ ፃጵዋ ማንሏያ፣

ኡባፌ አቋያ ሹቹ ጊዲሰ።

ሃይሲ ጎዳይ ኦሊዳባ፤

ቃሲ ኑ አይፊያሰካ ማላሊሲያባ)

ያጊይሳ ጌሻ ማፃፋፔ ናባቢቤኬቲ?» ያጊሰ።

12 ካሂኔ ሃላቃቲ፣ ሂጌ አሰታማሬቲኔ ጨማቲ ዩሱሲ ሄ ለመሱዋ ባንታ ቦላ ለመሲዳይሳ ኤሪዳ ጊሾ ኢያ ኦይካናው ኮዩደሶና፣ ሺን አሳሰ ያዩዲ፣ አጊ ቢደሶና።

ጊራ ጊርባ

(ማቶ 22:15-22፤ ሉቃ 20:20-26)

13 ቃሲ ኢያ ኦዳፔ ባላ ዳሚዲ፣ ኢያ ኦይካና ሜላ፣ ፋሪሳዊታፔኔ ሄሮዲሳ ባጋታፔ ጉላ አሳታ ኢያኮ ኪቲደሶና።

14 ኤንቲ ኢያኮ ዩዲ፣ «አሰታማሪያው፣ ኔኒ ቱማ ኦዳቲይሳኔ አሳፔ አሴ ሻኮናይሳ ኑኒ ኤሮሰ። ኔኒ አሴ ዱማያካ፤ ቃሲ ያሳ ኦጊያ ቱማቲላን ታማርሳሳ። ኑኒ ሮሜ ቢታ ካወዋ ቁሳሬሰ ጊራ ጊሪይሲ ዎጌዬ ዎጋ ጊዴኔ? ጊራ ጊራኔ አጋኔ?» ያጊደሶና።

15 ሺን ኤንታ ጨቦቲላ ዩሱሲ ኤሪዳ፣ «ታና አይሰ ፓጩቲ? አኔ ኢሲ ሳንቲሜ ታና ቤሲቲ» ያጊሰ።

16 ኤንቲ ኢያው ኤሂደሶና፣ «ሃ ማላይኔ ሱንላይ ኦዳይሴ?» ያጊዲ ኤንታ ኦይቹሰ።

ኤንቲ፣ «ሮሜ ካወዋ ቁሳሬይሳ» ያጊደሶና።

17 ዩሱሲ ዛሪዲ፣ «ያቲኮ፣ ቁሳሬይሳ ቁሳሬሰ፣ ያሳይሳ ያሳሰ ኢማቲ» ያጊን ኤንቲ ኢያባ ማላሌቲደሶና።

ሃይቆፔ ዳንደባ

(ማቶ 22:23-33፤ ሉቃ 20:27-40)

18 ሃይቂዳ አሲ ዳንዳና ገያ ሳዲቃዊታቴ ኢሲ ኢሲ አሳቲ ዩሱሳኮ ዩዲ፣ ሃይሳዳ ያገዲ፣ ኢያ ኦይቺዶሶና።

19 «አስታማሪያው፣ ሙሴይ ኑስ ሂገያ ፃፊሼ፣ ለማቸ ኤኪዳ አሲ ናዓ ዩሎና ሃይቂኮ፣ ሄ ሃይቂዳይሳ አሻይ ኢያ ማቺው ኤኪዲ፣ ባ አሻሰ ናዓ ዩላናው ቤሴስ» ያገይሳ ፃፊስ።

20 ቤኒ ዋዴ ላፑን አሻቲ ዳዔይሳታቴ ባይራይ ማቸ ኤኪዲ፣ ናዓ ዩሎና ሃይቂስ።

21 ናምዓንላይ ኢዮ ኤኪስ፣ አካ ናዓ ዩሎና ሃይቂስ። ሄዳንላይካ ሄሳዳ ሃኒስ።

22 ላፑናቲካ ሄሳሶ ኢዮ ኤኪዲ፣ ናዓ ዩሎና ሃይቂዶሶና። ኡባፌ ጉዩ፣ ቃሲ ሄ ማጫሲያ ሃይቃሱ።

23 ያቲን፣ ላፑናቲ ኢዮ ኤኪዳ ገሾ ሃይቂዳ አሳይ ሃይቆፔ ዳንዲያ ጋላስ፣ ኢያ ኤንታፌ አጫሳስ ማቸ ገዳኔ?» ያገዶሶና።

24 ዩሱሲ ዛሪዲ፣ «ሂንቴ ባሌይ፣ ጌሻ ማፃፋታ ዋይኮ ያሳ ዋልቃ ኤሮና ገሾሳ!

25 ሃይቂዳ አሳይ ሃይቆፔ ዳንዲያ ጋላስ፣ ሳሎን ዳዒያ ከታንቸታ ማለ ገዳናፔ አቲን አዴ አሳይ ኤኮኮና፤ ማጫ አሳይ ጌሌኮና።

26 ሺን ሃይቂዳይሳታ ዳንዲዋባ ገዲኮ፣ ሙሴ ማፃፋን ፃፊቲዳ ፀጉቲያ ቡሪያባ ኦዲያ ቤሳን፣ ያሳይ ሙሴኮ፣ ታኒ፣ አብራሃሜ ያሳ፣ ዩሳቃ ያሳ፣ ያይቆባ ያሳ፣ ገዳይሳ ናባቢቤኬቲ?

27 ሄሳ ገሾ፣ ኢ፣ ፓፃ ዳዔይሳታ ያሳፌ አቲን ሃይቂዳይሳታ ያሴ ገደና። ሂንቴ ዳሮ ባሊዳታ» ያገሰ።

ኡባፌ አዲያ ኪታ
(ማቶ 22:34-40፤ ሉቃ 10:25-28)

28 ሂጌ አስታማሪታቴ ኢሶይ ኤንቲ ፓላሜይሳ ሺቂዲ ሲዒስ። ቃሲ ዩሱሲ ኤንታው ሎይሴ ዛሪዳይሳ ሲዒዲ፣ «ኪታ ኡባፌ አዲያ ኪታይ አጫሴ?» ያገዲ ዩሱሳ ኦይቺስ።

29 ዩሱሲ ዛሪዲ፣ ኢያ ሃይሳዳ ያገሰ። «ኪታ ኡባፌ አዲያ ኪታ ሲዒቲ፤ ሲሲራዔሌ አሳው፣ ጎዳይ ኑ ያሳይ ኢሲ ጎዳ።

30 ኔ ጎዳ ኔ ያሳ ኔ ኩሜላ ዋዛናፔ፣ ኔ ኩሜላ ሽምፑዋፌ፣ ኔ ኩሜላ ቆፋፔ፣ ኔ ኩሜላ ዋልቃፌ ዶሳ» ያገሰ።

12:18 ሃ.ኦ 23:8 12:19 ዛሬ 25:5 12:26 ኬሳ 3:6 12:28 ሉቃ 10:25-28 12:29 ዛሬ 6:4-5

31 ቃሲ ከታ ኡባፌ አዲያ ናምዓንፉ ከታይ ሃይሳ፤ ላሴ ኡባ ኔ ሁዒያዳ ደሳ) ያጌይሳ፤ ሃይሳታፔ አዲያ ሃራ ከቲ ባዋ» ያጌሰ።

32 ሂጌ አስታማሬይ ዩሱሳኮ፡ «አስታማሬያው፡ ቱማ ጋዳሳ፤ ኔጌ ሳይሳይ ኢሲ ያሳ ያላላ። ኢያፔ አቲን ሃሪ ባዋ) ጊዳይሲ ቱማ።

33 ያሳ ኩሜላ ዋዛናፔ፡ ኩሜላ ቆፋፔኔ ኩሜላ ዋልቃፌ ደሴይሲኔ ቃሲ አሴ ኡባ ባ ሁዒያዳ ደሴይሲ፡ ፀጊያ ያርሹዋፌኔ ሃራ ያርሹ ኡባፌ አዲስ» ያጌሰ።

34 ዩሱሲ ሂጌ አስታማሬያ ዛሮይ አዲዳ ኤራንቾ አሳ ዛሮ ጊዳዳይሳ ቤዒዲ፡ «ኔጌ ያሳ ካዋቴላፌ ሃካባካ» ያጌሰ፤ ሄሳፌ ጉዩ፡ ዩሱሳ ሃራባ ኦይቻናው ኦኒካ ሚኒቤና።

ከሪስቶሲ ኦዴ ናዒ
(ማቶ 22:41-46፤ ሉቃ 20:41-46)

35 ዩሱሲ ያሳ ኬላን ታማርሲሼ፡ ሃይሳዳ ያጌሰ፡ «ሂጌ አስታማሬቲ ከሪስቶሳ ዋይጊዲ ዳዊቴ ናዒ ጎና?

36 ዳዊቴይ ጌሻ አያናን ኩሚዲ፡ ሳዳይ፡ ታ ጎዳ፡ «ታኒ ኔ ሞርኬታ ኔ ቶሆይ ዩዲያሶ ኦላና ጋካናው፡ ሃይሳን ታፔ ኡሻቻ ባጋራ ኡታ» ጌሰ) ያጌሰ።

37 ዳዊቴይ ባ ሁዒን ከሪስቶሳ፡ ሳዳ) ጊዲ ጃጌኮ፡ ያቲን፡ ከሪስቶሲ ዋኒዲ፡ ዳዊቴ ናዒ ጊዲ» ያጌሰ። ዳሮ አሳይ ዩሱሲ ጌይሳ ኡፋይሳን ሲዒደሶና።

ዩሱሲ ሂጌ አስታማሬታኔ ፋሪሳዊታ ቦሪስ
(ማቶ 23:1-36፤ ሉቃ 20:45-47)

38 ዩሱሲ ታማርሲሼ፡ ሃይሳዳ ያጌሰ፡ «ሂጌ አስታማሬታፔ ናጌቲቴ፤ ኤንቲ አዲሳ ማየ ማዒዲ ዩይሳኔ ጌያንካ አሳይ ኤንታ ቦንቾዲ ሳሮፌይሳ ደሶሶና።

39 ኤንቲ አይሁዴ ዋሳ ኬላታን ዳሮ ሎየ ኦይዴ ደሶሶና፤ ቃሲ አሲ ባንታና ሞኪያ ቤሳን ቦንቾ ቤሲ ደሶሶና።

40 ኤንቲ አምዔታ ኬላ ቦንቋዲ፡ ባንታው ሎየ ዳናው ዋሳ አዲሶሶና፤ ኤንቲ ኡባፌ አዲያ ፒርዳ ኤካና» ያጌሰ።

አምቤ ሙፃታ
(ሉቃ 21:1-4)

41 ዩሱሲ ያሳ ከላን ሙፃታ ዩጊያ ሳዲኒያ ማታን ኡቲዲ፥ አሳይ ባ ሚሺያ ሄ ሳዲኒያን ዩጌይሳ ቤዒስ፤ ዳሮ ዱሬ አሳይ ዳሮ ሚሺያ ሄ ሳዲኒያን ዩጎሶና።

42 ኢሲ ማንቆ አምቤያ ያዳ፥ ናምቡ ባካናታ ሄ ሳዲኒያን ዩጋሱ።

43 ዩሱሲ ባ ታማሬታ ያጊዲ፥ «ታኒ ሂንቴው ቱማ ኦዳይስ፤ ሙፃታ ሳዲኒያን ዩጊዳ አሳ ኡባፌ ሃ ማንቆ አምቤያ ዳርሳዳ ዩጋሱ።

44 አይስ ጊኮ፥ ሃራቲ ኡባይ ባንታው ፓላሂዳ ሚሺያፕ ዩጊዳሶና። ሺን ኢያ ባ ፓጨያፌ፥ ባው ዴቤያ አቁዋ ኩሜላ ኢማሱ» ያጊሱ።

13

ዩሱሲ ያሳ ከላይ ላሌታናይሳ ኮይሮቲዲ ኦዲስ
(ማቶ 24:1-2፤ ሉቃ 21:5-6)

1 ዩሱሲ ያሳ ከላፌ ከዩሺን፥ ኢያ ታማሬታፕ ኢሶይ፥ «አስታማሪያው፥ ሃ ሎፖ ሹቻኔ ሃ ሎፖ ሹቻ ከላ ቤዒይ!» ያጊሱ።

2 ዩሱሲ ዛሪዲ፥ «ሃ ጌታ ሹቻ ከላ ቤዒይ? ሃ ከላይ ሹቹ ሹቻ ቦላ ገምቤቲዳ ሜላ ላሌቶና አቴና፤ ኢሲ ሹቹካ አቶና ኡባይ ላሌታና» ያጊሱ።

ጎዳይ ያናፕ ኮይሮቲዲ ጋካና ጎዳኔ ዋያ
(ማቶ 24:3-14፤ ሉቃ 21:7-19)

3 ዩሱሲ ያሳ ከላፌ ሂኒ ባጋራ ሻማሆ ዴሪያ ቦላ ኡቲዳሺን፥ ጳዲሮስ፥ ያይቆስ፥ ዮሃኒስኔ ኢንዲሪያስ ባንታርካ ኢያኮ ዩዲ፥

4 «ሃይሲ አዉዴ ሃናኔኮ፥ ኑስ ኦዳ፤ ሃ ኡባይ ፖሌታና ዋዲያ ኤሪስያ ማላታይ አይቤ?» ያጊዲ ኦይቹደሶና።

5 ዩሱሲ ቃሲ ኤንታው ሃይሳዳ ያጊዲ ኦዲስ፥ «ሂንቴና ኦኒካ ባሌሶና ሜላ ናጌቲቴ።

6 ዳሮ አሳቲ ታ ሱንላን፥ (ታኒ ከሪሰቶሳ) ያጊዲ ታማርሲሹ ዩዲ፥ ዳሮ አሳ ባሌሳና።

7 ማታን ዴቤያ ኦላኔ ሃሆን ዴቤያ ኦላ ዋሪ ሂንቴ ሲቤያ ዋዴ ሂርጎፊቴ። ሄሳ ሜላባይ ሃናናው ቤሴስ፥ ሺን ዉርሴላይ ቡሮና።

8 ኢሲ ቢታ አሳይ ሃራ ቢታ አሳራ ኦሌታና፤ ቃሲ ኢሲ ካዋቱላይ ሃራ ካዋቱላታራ ኦሌታና፤ ቢታ ቃያይ ኡባ ቤሳን ሃናና፤ ኮሻይ ዳና፤ ሺን ሄሲ ኡባይ ዬሎ ኢቁላስ ዘኬ ማላ።

9 «ሺን ሂንቴ፣ ሂንቴ ሁዔን ናጌተቴ። አይስ ጊኮ፣ አሲ ሂንቴና ኦይኪዲ፣ ፐርዳ ኬላስ አላ ኢማና፤ ቃሲ አይሁዴ ዋሳ ኬላታንካ ሂንቴና ሊሶን ጋራፋና፤ ዴሪያ ሃሬይሳታ ሲንላኒኔ ካዋታ ሲንላን ታ ጊሾ ሂንቴ ማርካታናው ኤቃና።

10 ወርሴላይ ጋካናፔ ሲንሴ ዋንጌላይ ኮይሮ ዴሬ ኡባስ ኦዴታናው ቤሴሰ።

11 ኤንቴ ሂንቴና ፐርዳ ኬላ ኤሂያ ዋዴኔ አላ ኢማያ ዋዴ ዋይጊዲ ኦዲኮ ኮይሮ ሂርጎሬቴ፤ ሄ ሳቲያን ያሳይ ሂንቴው ኢማያባ ኦዲቴ። ሂንቴናን ጌሻ አያናይ ኦዴቴሲፔ ኣቲን ሂንቴና ጊዴኬታ።

12 «ኢሻይ ባ ኢሻ፣ አዋይ ባ ናዓ ዋዲሳና። ናይቲ ባንታና ዬሊዲይሳታ ቦላ ዴንዲዲ፣ ኤንታ ዋዲሳና።

13 አሳይ ኡባይ ሂንቴና ታ ሱንላ ጊሾ ኢፃና፣ ሺን ወርሴላ ጋካናው ማኒዲይ ኣታና።

ዬሩሳሌም ጋካና ኢታ ማቱዋ
(ማቶ 24:15-28፤ ሉቃ 21:20-24)

14 «ሺን ባሻ ቱናቱላይ ኤቃናው ቤሶና ቤሳን ኤቁዳሺን ሂንቴ ቤዓና።» (ኣኬኪሶ፣ ሄሲ ዋይ ጉሴኮ ናባቤይሲ ኣኬኮ!) «ዪሁዳ ቢታን ሄ ዋዴ ዴዔይሳቲ ዴሪያኮ ባቃቶ።

15 ኬላ ሁዔን ዴዔያ ኡራይካ ኢሲባ ኤካናው ዲጌ ዋዲዲ፣ ባ ሶ ጌሎፖ።

16 ጋዴን ዴዔይሲ ባ ማዑዋ ኤካናው ጉዬ ሲሞፎ።

17 ሄ ዋዴ ቃንላቲዳ ማጫሳታሲኔ ቋንላያ ማጫሳታሰ ዳር ኤንዓ ጊዳና።

18 ሺን ሃይሲ ኡባይ ሃኒያ ዋዴይ ባልጎ ጊዳና ማላ፣ ያሳ ዋሲቴ።

19 አይስ ጊኮ፣ ያሳይ ኣላማያ ማዲዳ ዋዲያፔ ደማዲ፣ ሃዒ ጋካናው ሃኒቦና ማቶይኔ ሲንላፊካ ሃኖና ማቶይ ኣሳ ቦላ ሄ ዋዴ ሃናና።

20 ጎዳይ ሄ ጋላሳታ ታይቡዋ ጉሶናኮ፣ ኣሴ ጊዲዲይ ኦኒካ ኣቴና። ሺን ኢ ባ ደሪዳ ኣሳ ጊሾ ሄ ጋላሳታ ታይቡዋ ጉሴሰ።

13:9 ማቶ 10:17-20፤ ሉቃ 12:11-12 13:13 ማቶ 10:22 13:14 ዛሬ 9:27፤ 11:31፤ 12:11 13:15 ሉቃ 17:31 13:19 ዛሬ 12:1፤ ዮ.ቆ 7:14

21 «ሄ ዎዴ ኦኒካ ሂንቴና፣ ሩህኮ፣ ኪሪሰቶሲ ሃይሳን ዴዔስ ዎይኮ ኪሪሰቶሲ ሂኒን ዴዔስ» ያጊኮ፣ ሄሳ ኣማኖፕቴ።

22 ዎርዳንቾ ኪሪሰቶሳቴኔ ዎርዶ ናቤቴ ዴንዲዲ ባንታው ዳንዳዔቴኮ፣ ሃሪ ኣቶሺን ያሳይ ዶሪዳይሳታካ ባሌፋናው ማላታታኔ ማላሊሲያባታ ቤሳና።

23 ሺን ሂንቴ ናጌቴቴ፤ ታኒ ሂንቴው ኡባባ ካሴታዳ ኦዳስ።

ኪሪሰቶሳ ናምዓንፉ ዩሳ
(ማቶ 24:29-31፤ ሉቃ 21:25-28)

24 «ሺን ሄ ዎዴ ሄ ዎያፔ ጉዬ፣
ኣዎይ ቆማና፤

ኣጌናይ ፖዑዎ ኣጋና፤
25 ያሊንቶቴ ሳሎፔ ኩንዳና፤
ቃሲ ሳሎን ዴዒያ ዎልቃቴካ ቃፃና።

26 ሄ ዎዴ ኣሳ ናዓይ፣ ጌታ ዎልቃራኔ ቦንቹዎራ ሻራ ጊዶራ ዩሺን ኤንቴ ቤዓና።

27 ሄ ዎዴ ታኒ ኪታንቾታ ሳዓ ኦይዲ ባጋ ኪታና፤ ሳዓ ጋፃፔ ሳሎዎ ጋፃ ጋካናው፣ ያሳይ ዶሪዳ ኣሳ ሺሻና።

ዎዴይ ጋኪዳይሳ ኤሪሲያ ባላሴ ሚሊው
(ማቶ 24:32-35፤ ሉቃ 21:29-33)

28 «ለሚሱዎ ባላሴ ሚላፌ ኣኬኪቴ፤ ባላሲያ ኣጨያ ዎዴኔ ኢ ሃይላይ ጨልዒያ ዎዴ ቶርቹይ ማታቴዳይሳ ሂንቴ ኤሪታ።

29 ሄሳዳካ፣ ሂንቴ ሄ ኡባባይ ሃኔይሳ ቤዒያ ዎዴ ኢ ማቴዲ ፔንጌ ጋኪዳይሳ ኤሪቴ።

30 ታኒ ሂንቴው ቱማ ኦዳይስ፤ ሃ ኡባባይ ሃናና ጋካናው ሃይሳን ዴዒያ ኣሳ ኡባይ ሃይቄና።

31 ሳሎይኔ ሳዓይ ኣቆና፣ ሺን ታ ቃላይ ኡባራካ ኣጴና።

ሳዳይ ያና ጋላሳኔ ሳቴያ ኦኒካ ኤሪና
(ማቶ 24:36-44)

32 «ሺን ሄ ጋላሳኔ ሄ ሳቴያ ኣዎ ፃላላፔ ኣቴን ሃሪ ኣቶሺን ሳሎን ዴዒያ ኪታንቾታ ጊዲን ዎይኮ ናዓ ጊዲን ኦኒካ ኤሪይ ባዎ።

33 ሄ ዎዴይ ኣዉዴ ጊዳኔኮ፣ ሂንቴ ኤርና ጊሾ ናጌቴቴኔ ሚኒቴ።

13:24 ኣሳ 13:10፤ ኤር 2:10 13:25 ኣሳ 34:4፤ ዮ.ቆ 6:13፤ ኤር 2:10
13:26 ዛሬ 7:13፤ ዮ.ቆ 1:7 13:32 ማቶ 24:36

34 ታ ዩሳይ ባ ከላ አገዲ፣ ኦጌ ቢያ ኡራ ሜላ። ኡራይ ባ አይሌታ ሁዔን ሁዔን ኦሱቀ ኢሚዲ ኤንታ ባ ኦሱቀሰ አቀ ኦሊሰ፤ ቃሲ ናጌይሲካ ሚንሊዲ ናጋና ሜላ ከተሰ።

35 «ሃሳ ገሸ፣ ሚኒቲ። አይሰ ገኮ፣ ከላቀይ አማርሲ ገዲን ዋይኮ ገዲ ቢላሃ ገዲን ዋይኮ ኩቶ ዋሶ ገዲን ዋይኮ ዋንታ ጉራ ገዲን አዉዴ ያኔኮ፣ ሂንቲ ኤሬኬታ።

36 ሂንቲ አከኮና ኢ ዩዲ ሂንቲና ጲሰኪዲ ዴዲሺን ዴሞና ሜላ ሚኒቲ።

37 ታኒ ሂንቲው ኦዴይሳ አሳ ኡባሰ ኦዴይሰ፤ ሚኒቲ» ያገሰ።

14

ከሪሰቶሳ ቦላ ማቄቲዶሶና

(ማቶ 26:1-5፤ ሉቃ 22:1-2፤ ዮሃ 11:45-53)

1 ፓሲካ ባሌ ቦንቺያ ጋላሳይኔ ኡይላ ባሌ ቦንቺያ ጋላሳይ ጋካናው ናሞው ጋላሲ አተሰ። ካሂኔ ሃላቃቲኔ ሂጌ አሰታማሬቲ አሲ ኤሮና ዬሱሳ ኦይኪዲ ዋጲያ ኦጌ ኮዮሶና።

2 «አሳይ ኦሺ ከሶና ሜላ ፓሲካ ቦንቺያ ጋላሳን ሄሳ አላኮ» ያገደሶና።

ዬሱሳ ሺቱዋ ቲዩዳ ማጫሲው

(ማቶ 26:6-13፤ ዮሃ 12:1-8)

3 ዬሱሲ ቢታኒያ ካታማን ባሮ ሃርጋንቹዋ ሲሞና ሶን ጊቢራ ቦላ ኡቲዳሺን፣ አሲ ማጫሲያ አልባሰዲሮሴ ጊያ ሹቻሬ ኦሴቲዳ ጲልቃዳ ኩሜላ ናርዶሴ ጊያ ዳሮ አልዎ ሺቶ ኤካዳ ያሱ። ሄ ጲልቃዳያ ሜንላዳ ሺቱዋ ዬሱሳ ሁዒያን ቲጋሱ።

4 ሄ ቤሳን ዴዲያ አሳፔ አሶይ አሶይ ሃንቄቲዳ፣ «ሃ ሺቶይ ሜላ ጮ አቲይ አይቢሴ?

5 ሃ ሺቱዋ ሄቩ ጻቱ ዲናሬን * ባይዚዲ፣ ሚሺያ ማንቆታሰ አማናው ዳንዴዴቲሰ» ያገዲ ባንታ ገዲን ኦዴቲዶሶና። ያቲዳ፣ ሄ ማጫሲው ዳሮ ቦሪዶሶና።

6 ሺን ዬሱሲ «ሃ ማጫሲው አይኮካ ጎፒቲ፤ አዮ አይሰ ዋይሴቲ? ኢያ ታው ሎዎባ ኦሳሱ።

13:34 ሉቃ 12:36 14:1 ከሳ 12:1 14:3 ሉቃ 7:37 * 14:5 ሄቩ ጻቱ ዲናሬ፡ አሲ አሳሰ ላይላን ጨጌቲያ ሎዎ ዳሞዜፔ ቦላ ገዲያ ሚሹ።

7 ማንቆቲ ኡባ ዎዴ ሂንቴራ ዴያሶና። ሂንቴ ኮዪዳ ዎዴ አዉዴካ ሂንቴ ኤንታ ማዳናው ዳንዳዔታ፣ ሺን ታኒ ኡባ ዎዴ ሂንቴራ ዴዒኤ።

8 ኢያ ባ ዳንዳዒዳይሳ ኦላሱ፤ ቃሲ ታና ሞጎስ ገቢሳናው ካሴታዳ ሺቶ ቲያሱ።

9 ታኒ ሂንቴው ቱማ ኦዳይሰ፤ ሳዓ ኡባን ዎንጌላ ኦዲያሶን አዉንካ፣ አሳይ ኢዮ አኬካና ሜላ ሃ ኢያ ኦላዳይሲ ኦዴታና» ያገሰ።

ዪሁዲ ዬሱሳ አሉዲ ኢማናው ዘሬቲስ

(ማቶ 26:14-16፤ ሉቃ 22:3-6)

10 ታማኔ ናምዑ ታማሬታፔ ኢሶይ አሰቆርታ ዪሁዲ ጌቴቴይሲ ዬሱሳ ካሂኔ ሃላቃታስ አሉ ኢማናው ኤንታኮ ቢስ።

11 ኤንቲ ሄሳ ሲዒዳ ዎዴ ኡፋይቲዲ፣ «ኮኒ ኔው ሚሼ ኢማና» ያገደሶና፤ ዪሁዲ ዬሱሳ አሉ ኢማናው ኢንጃ ዎዴ ኮዬስ።

ዬሱሲ ባ ታማሬታራ ፓሲካ ሚስ

(ማቶ 26:17-25፤ ሉቃ 22:7-14፣ 21-23፤ ዮሃ 13:21-30)

12 ኡይላ ባሌይ ቦንቹቲያ ኮይሮ ጋላስ፣ ፓሲካ ካላ ማናው ማራዜ ሹኪያ ዎዴ ዬሱሳ ታማሬቲ ኢያኮ፣ «ፓሲካ ቦንቹያ ጋላስ ኔኒ ማና ካላ ኮኒ አው ቢዲ ገቢሲና?» ገዲ ኦይቹደሶና።

13 ዬሱሲ ባ ታማሬታፔ ናምዓታ ሃይሳዳ ያገዲ ከቲስ፣ «ካታማ ቢቴ፤ ሂንቴ ቢሺን፣ ኦቶራ ሃሌ ቶኪዳ ኢሲ ኡሪይ ሂንቴራ ጋሄታና፤ ኢያ ካላቴ።

14 ኢ ቢዲ ጌሊያ ኬላዎ፣ «አስታማሬይ ኔኮ፣ «ታኒ ታ ታማሬታራ ፓሲካ ማናው ኦማላ ከፊሌይ አዉኔ?» ያገሰን ያገቱ።

15 ኬላዎይ ሂንቴና ፖቂያ ቦላ ዴዒያ ገቢ ኡቲዳ ዳልጋ ከፊሌ ቤሳና፤ ሄሳን ገቢሲቴ» ያገሰ።

16 ሄ ናምዑ ታማሬቲ ኬዪዲ፣ ካታማ ቢደሶና፤ ዬሱሲ ኤንታው ኡዲዳይሳዳ ዴሚዲ፣ ፓሲካ ካላ ገቢሲደሶና።

17 ሳዓይ ኦማርሲያ ዎዴ ዬሱሲ ታማኔ ናምዑ ታማሬታራ ያ ቢስ።

18 ኤንቲ ኡቲዲ ካሉ ሚሺን፣ ዬሱሲ ኤንታኮ፣ «ታኒ ሂንቴው ቱማ ኦዳይሰ፤ ሂንቴፌ ኢሶይ ታራ ሜይሲ፣ ታና አሉ ኢማና» ያገሰ።

19 ኢያ ታማሬቲ ዳጋሚዲ፣ ባንታ ሁዔን ሁዔን፣ «ቱማ ታኔሻ?» ያገዲ ኢያ ኦይቹደሶና።

20 ዩሱፊ ዛሬዲ፡ «ሄ ኡራይ ሂንቲ ታማኔ ናምዓታፔ ኢሱዋ፤ ኢ ታራ ኢሲፌ ቱሻናው ባ ኡይላ ሻቲያን ዩዳይሳ።

21 አሳ ናዓይ፡ ጌሻ ማፃፋይ ሃይቃና ጊዳይሳዳ ሃይቃና፡ ሺን አሳ ናዓ፡ አሉ ኢሚያ ኡራ ኣዬ። ሄ ኡራይ ዩሌቶና ኣቲዳኮ ኢያው ሎፖሺን» ያገሰ።

ጎዳ ካሁዋ

(ማቶ 26:26-30፤ ሉቃ 22:14-20፤ 1ቆር 11:23-25)

22 ኤንቲ ሚሺን፡ ዩሱፊ ኡይላ ኤኪዲ፡ ያሳ ጋላቲስ፤ ሄ ኡይላ ሚንሊዲ፡ ባ ታማሬታስ ኢሚሺ፡ «ሄዒቲ፡ ሃይሲ ታ ኣሹዋ» ያገሰ።

23 ፀዓ ኤኪዲ፡ ያሳ ጋላቲዲ፡ ኤንታው ኢሚን ኡባይካ ሄ ፀዓፔ ኡዪዶሶና።

24 ዩሱፊ፡ «ሃይሲ ኦራላ ጫቁዋን ዳር አሳ ጊሾ ጉኪያ ታ ሱላ።

25 ታኒ ሂንቲው ቱማ ኦዳይስ፤ ታኒ ያሳ ካዎቲላን ኦራላ ዎይኒያ ኡያና ጋላሳይ ጋካናው ዛራዳ ሃ ዎይኒያፔ ኡዪኬ» ያገሰ።

26 ማዘሙሬ ዩዲዳፔ ጉዬ ሻማሆ ዳሪያ ቦላ ቢዶሶና።

ጳጳርሲ ካዳናይሳ ዩሱፊ ኮይርቲዲ ኦዲስ

(ማቶ 26:31-35፤ ሉቃ 22:31-34፤ ዮሃ 13:36-38)

27 ዩሱፊ ኤንታኮ፡ «ሂንቲ ኡባይ ታና ዩጊ ኣጊዲ ባቃታና፤ ጌሻ ማፃፋይ፡

የሳይ ዶርሳ ሄሚይሳ ዎጳና፡

ዶርሳቲ ኡባይ ላሌታና)

ያገሰ።

28 ሺን ታኒ ሃይቆፔ ዳንዲዳፔ ጉዬ ሂንቲፌ ካስታዳ ጋለላ ባና» ያገሰ።

29 ጳጳርሲ ዛሬዲ፡ «ኤንቲ ኡባይ ኔና ዩጊ ኣጊዲ ባቃቲኮካ፡ ታ ኔና ኣጊኬ» ያገሰ።

30 ዩሱፊ ጳጳርሳኮ፡ «ታኒ ኔው ቱማ ኦዳይስ፤ ሃቺ ቃማ ኩቶይ ናምዑ ቶሆ ዋሳናፔ ሲንሌ ኔኒ ታና ሄቹ ቶሆ ካዳና» ያገሰ።

31 ሺን ጳጳርሲ ካሴይሳፌ ሚንሊዲ፡ «ታኒ ሃሪ ኣቶሺን፡ ኔራ ኢሲፌ ሃይቂያኮካ፡ ኔና ካዲኬ» ያገሰ። ቃሲ ሃራቲ ኡባቲካ ሄሳዳ ጊዶሶና።

ዩሱሲ ጌቴሴማኔን ዋሲሰ
(ማቶ 26:36-46፤ ሉቃ 22:39-46)

32 ጌቴሴማኔ ጊያ ቤሳ ቢደሶና፤ ዩሱሲ ባ ታማሬታኮ፡ «ታኒ ያሳ ዋሳዳ ሲማና ጋካናው ሂንቲ ሃይሳን ኡቲሺቲ» ያገሰ።

33 ዩሱሲ ጳዳሮሳ፡ ያይቆባኔ ዮሃንሳ ባራ ኤኪዲ ቢሰ፤ ዳር ዋዩቲሰኔ ኡንዔቲሰ።

34 ቃሲ ኤንታኮ፡ «ታኒ ሃይቃና ጋካናው አዛናሰ፡ ሃይሳን ጋምዒሺቲ፤ ጳሰኮፊቲ» ያገሰ።

35 ጉሉ ሲንሌ ሸቂዲ፡ ሳዓን ጉፋኒዲ፡ ዳንዳዔቲያባ ጊዲኮ፡ ሄ ዋያ ሳቲይ ባፔ አቋና ማላ፡ ያሳ ዋሲሰ።

36 ቃሲ፡ «አባ፡ ታ አዋው፡ ኡባባይ ኔው ዳንዳዔቲሰ፡ ሃ ዋዩ ፀዓ ታፔ ዲጋ። ሺን ኔ ሸኔይ ሃናፔ ኣቲን ታ ሸኔይ ሃናፖ» ያገሰ።

37 ዩሱሲ ባ ታማሬታኮ ሲሚ ዩዲ፡ ኤንቲ ጳሰኪዳሺን ዳሚዲ፡ ጳዳሮሳኮ፡ «ሲሞና፡ ጳሰካዲ? ኔኒ ኢሲ ሳቲካ ባርካዳ ናጋናው ዳንዳዓቢኪ?»

38 ፓጩን ሂንቲ ጌሎና ማላ ባርኪዲ ናገቲኔ ያሳ ዋሲቲ። ሂንቲው ሎዖ አዋይ ዳዔሰ፡ ሺን ሂንቲ ዳቡራንቾ አሲ» ያገሰ።

39 ቃሲካ ቢዲ ካሴይሳዳካ ያሳ ዋሲሰ።

40 ባ ታማሬታኮ ጉዬ ሲሚዲ ያ ዋዩ ጳሰኪዳሺን ዳሚሰ። ኤንታ አይፊያ ጳሰኮይ ጎዚ ዋሉዳ ገሾ ኢያኮ አይ ኦዴቲያኮካ ኤሮኮና።

41 ሄቫንሶ ኤንታኮ ዩዲ፡ «ሃዒ ጋካናውካ ጳሰኬቲኔ ሸምፔቲ? ሂዛ፡ ገዳና፤ ሳቲይ ጋኪሰ፤ ቤዒቲ! አሳ ናዓይ፡ ናጋራንቾ አሳታሰ አቋ ኢሜታና ዋዳይ ጋኪሰ።

42 ዳንዲዲ ዩቋቲ፤ ቤዒቲ፡ ታና አሉ ኢማናይሲ ጋኪሰ» ያገሰ።

ዩሱሲ ባ ሞርኬታ ኩሺን ኦይኬቲሰ
(ማቶ 26:47-56፤ ሉቃ 22:47-53፤ ዮሃ 18:3-12)

43 ዩሱሲ ሄሳ ቡሮ ኦዲሺን፡ ታማኔ ናሞዑ ኢያ ታማሬታፔ ኢሶይ፡ ዩሁዲ፡ ኤሌሲዲ ጋኪ ዋቋሰ። ቃሲ ካሂኔ ሃላቃቲ፡ ሂጌ አሰታማሬቲኔ ጨማቲ ኪቲን፡ ማሸኔ ፃምዓ አይኪዳ ዳር አሳይ ኢያራ ኢሲፌ ዩደሶና።

44 ዩሱሳ አሉ ኢማናይሲ ሄ ዳር አሳሰ፡ «ታኒ ዬሬይ ኢያ፤ ኢያ ኦይኪዲ፡ ሎይሉ ናገዲ፡ ኤኪ ኤፊቲ» ያገዲ ማላ ኦዲ ዋሉሰ።

45 ዪሁዲ ጋኪ ዋጂዳ ሜላ ዩሱሳኮ ሸቂዳ፡ «አስታማሪያው» ያጊዲ ዩሱሳ ዩሪ ኤኪስ።

46 ሄ ዳር አሳይ ዩሱሳ ኦይኪደሶና።

47 ሺን ማታን ኤቁዳይሳታፔ ኢሶይ ባ ማሻ ሾዲዲ ካሂኔ ሃላቃ አይሊያ ሾጩዲ፡ ኢያ ሃይላ ቃንጂዲ ሆሊስ።

48 ዩሱሲ ዛሪዲ፡ ሄ ሸቂዳ ዳር አሳኮ፡ «ታና ፓንጋ ኬሲዲ፡ ፓንጋ ኦይኬይሳዳ ኦይካናው ማሼኔ ፃሞዓ ኦይኪዲ ዩዴቲ?»

49 ታኒ ያሳ ኬላን ታማርሳሼ፡ ጋላስ ጋላስ ሂንቴራ ዴዲያ ዋዴ ታና ኦይኪቤኬታ፡ ሺን ጌሻ ማፃፋይ ጊዳይሲ ፖሌታናው ቤሴስ» ያጊስ።

50 ኢያ ታማራቲ ኡባይ ኢያ ዩጊ አጊዲ ባቃቲደሶና።

51 ላፃና ፃላላ ማዒዳ ኢሲ ናቴላ ኡራይ ዩሱሳ ካሌይሳ አሳይ ኦይኪስ።

52 ሺን ሄ ኡራይ ላፃና ዩጊ አጊዲ፡ ፃሬ ካሎ ባቃቲስ።

ዩሱሳ ፐርዳ ሻንጎ ሲንሴ ኤፊደሶና

(ማቶ 26:57-68፤ ሉቃ 22:54-55፤ 63-71፤ ዮሃ 18:13-14፤ 19-24)

53 አሳይ ዩሱሳ ካሂኔ ሃላቃ ሶ ኤፊደሶና። ያን ካሂኔ ሃላቃቲ፡ ጩማቲኔ ሂጌ አስታማሪቲ ሸቂዲ ዴፖሶና።

54 ጰፂርሲ ካሂኔ ሃላቃ ዛባ ጋካናው ሃሆን ኢያ ካሊ ቢዲ ያን ናጌይሳታራ ኡቲዲ ታማ ካዩስ።

55 ካሂኔ ሃላቃቲኔ ሸቂዳ አሳ ኡባይ ዩሱሳ ዋጃናው ኢያ ቦላ ማርካ ኮዩደሶና፡ ሺን አይኮካ ዴሚቦኮና።

56 ዳር አሳቲ ኢያ ቦላ ዋርዶ ማርካቲደሶና፡ ሺን ኤንታ ማርካቴላይ ኢሲኖ ጊዳና።

57-58 ኢሲ ኢሲ አሳቲ ዴንዲ ኤቁዲ ዩሱሳ ቦላ፡ «ኢ፡ ታኒ አሲ ኬፂዳ ሃ ያሳ ኬላ ላላዳ፡ አሳ ኩሼን ኬፂቲቦና ሃራ ያሳ ኬላ ሃሹ፡ ጋላሳ ጊደን ኬፃና፡ ጊሺን ኦኒ ሲዒዳ» ያጊዲ ዋርዶ ማርካቲደሶና።

59 ጊደሺን፡ ኤንታ ማርካቴላይ ሄሳንካ ኢሲኖ ጊዳና።

60 ካሂኔ ሃላቃይ አሳ ኡባ ሲንላን ዴንዲ ኤቁዲ፡ «ሃይሳቲ ኔና ሞቲያ ሞቱሞስ ኔ ዛሪያባይ ባዌ?» ያጊዲ ዩሱሳ ኦይቺስ።

61 ሺን ዩሱሲ ሲዒ ጊስ፤ አይኮካ ዛሪቤና። ካሂኔ ሃላቃይ፡ «አንጃቲዳ ያሳ ናዓይ፡ ኪሪስቶሲ ኔኔዬ?» ያጊዲ ዛሪ ኦይቺስ።

62 ዩሱሲ ዛሪዲ፣ «ኤ ታና፣ ሂንቴ አሳ ናዓይ፣ ዋልቃማ ያሳፊ ኡሻቻ ባጋራ ኡተዳሺን ቃሲ ሳሉዋ ሻራራ ዩሺን ቤዓና» ያገሰ።

63 ካሂኔ ሃላቃይ ባ ማዑዋ ፔዲዲ፣ «ኑና ሃራ ማርካ አይ ኮሺ?»

64 ሂንቴ ኢያ ጫሻ ሲዒዳታ፤ ሂንቴ ቆፋይ አይቤ?» ያገሰ። ኡንቴ ኡባይ፣ «ኢ ሃይቃናው ቤሴስ» ያገዲ ኢያ ቦላ ፒርዲደሶና።

65 ኡንታፊ ኢሶቲ ኢሶቲ ኢያ ቦላ ጩቴሊ ኦይኪደሶና። ኢያ አይፊያ ጎዚዲ ባቂሼ፣ «ኔና ዳቺዳይ ኦኔ? ኦኔ ኮሰ ኦዳ!» ያገደሶና። ናጌይሳቲ ኢያ ኤኪ ኤፊዲ ጋራፊደሶና።

ጳጳርሲ ዩሱሳ ካዲሰ
(ማቶ 26:69-75፤ ሉቃ 22:56-62፤ ዮሃ 18:15-18፣ 25-27)

66 ጳጳርሲ ካሂኔ ሃላቃ ዛባን ጋርሳ ባጋራ ዳዒሺን፣ ካሂኔ ሃላቃ ማጫ አይሌታፔ ኢሲኒያ ያ ያሱ።

67 ጳጳርሲ ታማ ካዬይሳ ቤዓዳ፣ ቲሺ ኦላ ጃላዳ፣ «ኔኒካ ናዚሬቴ ዩሱሳራ ዳዓሳ» ያጋሱ።

68 ሺን ጳጳርሲ፣ «ኔ ጌይሲ አይቤኮ ታ ኤሪኬ፣ ታው ኦኬኬቴና» ያገዲ ካዲሰ። ያገ ሲሚዲ ዛጎ ኬያ ዋዴ ሶሁዋራ ኩቶይ ዋሲሰ።

69 ሄ አይሊያ ጳጳርሳ ቤዓዳ፣ ኢያ ማታን ኤቂዳ አሳታኮ፣ «ሃ ኡራይካ ኡንታራ ዳዔስ» ጋዳ ዛራ ኦዳሱ።

70 ሺን ጳጳርሲ ቃሲካ ካዲሰ።

ጉሊ ጋምዒሺን፣ ማታን ኤቂዳ አሳቲ ናምዓንሉ ጳጳርሳኮ፣ «ኔኒ ጋሊሊ ቢታ ኦሲ ገዲያ ገሾ ቱማ ኡንታራ ዳዓሳ» ያገደሶና።

71 ሺን ጳጳርሲ፣ «ታኒ ሂንቴ ገያ ኡራ ኤሪኬ!» ያገዲ ባና ቃንጌሊኔ ጫቆ ኦይኪሰ።

72 ሶሁዋራ ኩቶይ ናምዓንሉ ዋሲ ኣገሰ። ጳጳርሲ ዩሱሲ ኢያኮ፣ «ኔኒ ኩቶይ ናምዑ ቶሆ ዋሳናፔ ሲንጫ ሄሹ ቶሆ ታና ካዳና» ኢያኮ ገዲይሳ ኦኬኪዲ ዳሮ ዩኪሰ።

15

ዩሱሳ ጳላያሳኮ ኤፊደሶና
(ማቶ 27:1-2፣ 11-14፤ ሉቃ 23:1-5፤ ዮሃ 18:28-38)

1 ዋንታ ጉራ ኤሌሲዲ ካሂኔ ሃላቃቲ፣ ጨማቲ፣ ሂኔ ኣስታማራቲኔ ኣይሁዴ ሻንጎቲ ኡባይ ሸቁዲ ማቁቲደሶና። ኤንቲ ዩሱሳ ቃቺ ኤፊዲ ጲላዎሳስ ኣሉ ኢሚደሶና።

2 ጲላዎሳስ ኢያኮ፣ «ኔኒ ኣይሁዴታ ካዎ?» ያጊዲ ኣይቺሰ።

ዩሱሲ ዛሪዲ፣ «ኔ ጋዳሳ» ያጊሰ።

3 ካሂኔ ሃላቃቲ ዩሱሳ ዳሮባን ሞቲደሶና።

4 ሺን ጲላዎሳስ ዛሪዲ ዩሱሳኮ፣ «ኔው ዛሪያባይ ባዌ? ኤንቲ ኔ ቦላ ኣይ ሜላ ሞቱዎ ኤሂያኮ ቤዒኪ?» ያጊሰ።

5 ሺን ዩሱሲ ሃራባ ዛርና ኢዲን፣ ጲላዎሳስ ማላሌቲሰ።

ዩሱሳ ሃይቆ ጊዲ ፒርዲደሶና

(ማቶ 27:15-26፤ ሉቃ 23:13-25፤ ዮሃ 18:39-40፤ 19:1-

16)

6 ጲላዎሳስ ፓሲካ ባሌ ቦንቺያ ጋላሳን ኣሳይ ኮያ ኢሲ ኡራ ቃሾፕ ቢሊያ ሜዜይ ዴዔስ።

7 ሄ ዎዴ ኢሲ ባርባና ጊያ ኡራይ ኦሹ ኬሲዲ ሸምፖ ዎዲዳ ኣሳታራ ኢሲፌ ቃሾ ኬፋን ዴዔስ።

8 ሸቁዳ ዳር ኣሳይ ጲላዎሳስ ካሴይሳዳ ኦፋና ሜላ ኢያ ኣይቺደሶና።

9 ጲላዎሳስ ኣሳ ዛሪዲ፣ «ታኒ ሂንቲው ኣይሁዴታ ካወዎ ቢላናይሳ ኮዬቲ?» ያጊዲ ኣይቺሰ።

10 ሄሳ ኢ ጊዳይ፣ ካሂኔ ሃላቃቲ ዩሱሳ ቃናቲዲ ኣሉ ኢሚደይሳ ኤሪያ ጊሾሳ።

11 ሺን ካሂኔ ሃላቃቲ ዩሱሳ ጊሾ ባርባና ቢላናዳ፣ ሄ ሸቁዳ ኣሳይ ጲላዎሳስ ዎሳና ሜላ ኣሳ ማቁደሶና።

12 ጲላዎሳስ ዛሪዲ፣ «ያቲን፣ ሃ ሂንቲ ኣይሁዴ ካዎ ጌይሳ ዎቶ?» ያጊሰ።

13 ኣሳይ ጲላዎሳስ ቦላ ዋሲዲ፣ «ማስቃሊያ ቦላ ኢያ ካቃ» ያጊደሶና።

14 ጲላዎሳስ ኣሳኮ፣ «ኣይሰ? ኢ ኣይ ኢታባ ኦሌዴ?» ያጊሰ። ሺን ኣሳይ ካሴይሳፌ ጉጂ ዋሲዲ፣ «ማስቃሊያ ቦላ ኢያ ካቃ» ያጊደሶና።

15 ጲላዎሳስ ኣሳ ኡፋይሳናው ኮዬዲ፣ ባርባና ኣሳስ ቢሊስ፤ ያቲዲ ሊሶን ዩሱሳ ጋራፊዲ፣ ማስቃሊያ ቦላ ካቃና ሜላ ኤንታው ኣሉ ኢሚሰ።

ዎታዳሬቲ ዩሱሳ ቶቺደሶና

(ማቶ 27:27-31፤ ዮሃ 19:2-3)

16 ሄሳፌ ጉዬ፣ ዋታዳሬቲ ዬሱሳ ዳሪያ ሃሪይሳ ኦሶ ኬላ ኤኪ ኤፌዲ፣ ሃራ ዋታዳሬታ ኡባ ኢሲፌ ጃጊደሶና።

17 ቃሲ ዘየ አፊላ ኢያ ማይዚደሶና፤ አጉንላ ካላቻ ገጊሲዲ፣ ኢያ ሁዒን ዋሊደሶና።

18 ሄሳፌ ጉዬ፣ ኢያኮ፣ «አይሁዳታ ካወዋው ሚሪናው ካዋታ» ያጊዲ፣ ኢያው ዘጊደሶና።

19 ኢያ ሁዒያ ፃምዒን ሾጪደሶና፤ ቃሲ ኢያ ቦላ ጩቲደሶና፤ ጉልባቲዲ ኢያው ጎይኒደሶና።

20 ኢያ ቶቺዳይሳፌ ጉዬ ዘየ አፊላ ኢያፔ ቃሪ ኤኪዲ፣ ኢያ አፊላ ኢያ ማይዚዲ ማሰቃሊያ ቦላ ኢያ ካቃናው ኤኪ ኤፌደሶና።

ዬሱሳ ካቂደሶና

(ማቶ 27:32-44፤ ሉቃ 23:26-43፤ ዮሃ 19:17-27)

21 ኤንቲ ቢሼ፣ ኢሰኪንዲሬኔ ሩፎሳ አዋ፣ ሲሞና ጊያ ቁሬና ቢታ አሲ፣ ጋፃሬፔ ካታማ ዬይሳራ ጋሄቲዲ፣ ዬሱሳ ማሰቃሊያ ዋልቃን ቶሲደሶና።

22 ያቲዲ ጎልጎታ ጊያ ቤሳ ዬሱሳ ኤፌደሶና። «ጎልጎታ» ጉሳይ «ሁዒ ጉጌ» ጉሱ።

23 ሳኮይ ሲዒቶና ሜላ ካርቤ ጊያ ቋሌይ ዋላኬቲዳ ዋይኔ ኡዮ ጊዲ ኢያው አሚደሶና። ሺን ኢ ኡዮና ኢዲሰ።

24 ኤንቲ ማሰቃሊያ ቦላ ኢያ ካቂደሶና። እና አይቢ ጋካኔኮ ጊዲ ኢያ አፊላ ሻኪዲ ሳማ ዬጊደሶና።

25 ኤንቲ ማሰቃሊያ ቦላ ኢያ ካቂያ ዋዴ ዋንታፌ ሄቹ ሳቲ።

26 ኤንቲ፣ «አይሁዳታ ካወዋ» ያጊዲ ኢያ ሞቲያ ፀፌ ፃፊዲ ዋሊደሶና።

27 ዬሱሳራ ናምዑ ፓንጋታ ኢሱዋ ኢያፔ ኡሻቻ ባጋራ ሃንኩዋ ኢያፔ ሃዲርሳ ባጋራ ማሰቃሊያ ቦላ ካቂደሶና።

28 ጌሻ ማፃፋይ፣ «ኢታባ ኦሊዳ አሳታራ ኢ ፓይዴቲሰ» ጌቲቲዳይሲ ፖሌቲሰ።

29 ኦጊያራ አዲያ አሳይ ዬሱሳ ካዲዲ፣ ባንታ ሁዒያ ቃሊዲ ጫዬደሶና፤ «ሄሶ! ያሳ ኬላ ላላዳ ሄቹ ጋላሳ ጊደን ኬይይሶ፣ ኔ ሁዒያ አሻ፤

30 አኔ ማሰቃሊያ ቦላፌ ዋቋ» ያጊደሶና።

31 ሄሳዳካ፣ ካሄኔ ሃላቃቲ ሂጊያ ታማርሴይሳታራ ኢሲፌ ዬሱሳ ቶቺዲ፣ «ሃራታ አሺሰ፣ ሺን ባና አሻናው ዳንዳዔና፤

32 ኑኒ በዒዲ አማናና ሜላ ኪሪሰቶሲ፣ ኢሰራዔል ካዎይ፣ አኔ ማስቃሊያ ቦላፌ ሃዒ ዎቶ» ያጊደሶና። ቃሲ ሃሪ አቶሺን፣ ኢያራ ማስቃሊያ ቦላ ካቂቲዲይሳቲካ ኢያ ቶቺደሶና።

ዬሱሲ ሃይቂስ

(ማቶ 27:45-56፤ ሉቃ 23:44-49፤ ዮሃ 19:28-30)

33 ኡሱፑን ሳቴፔ ደሚዲ፣ ኡዲፋን ሳቴ ጋካናው ቢታ ኡባይ ቋሚሰ።

34 ኡዲፋን ሳቲያን ዬሱሲ ባ ቃላ ቶቁ ኦሲዲ፣ «ኤሎሄ፣ ኤሎሄ፣ ላማ ሳባቂታኒ?» ያጊሰ። ሄሳ ጉሳይ፣ «ታ ያሳው፣ ታ ያሳው፣ ታና አይሰ አጋዲ?» ጉሱ።

35 ሄሳን ኤቁዳ አሳፔ ኢሶይ ኢሶይ ሄሳ ሲዒዲ፣ «ሄኮ፣ ኤሊያሳ ያጊሰ» ያጊሰ።

36 ሄ አሳፔ ኢሶይ ዎዲዲ፣ ኢሰፖንጃን ጫላ ዎይኔ ኩንሲሰ፤ ሄሳ ዓምዓ ዪራን ዎሲዲ፣ «ናጊቴ፤ ኤሊያሲ ማስቃሊያፔ ኢያ ዎቶሳናው ያኔኮ አኔ በዎሰ» ያጊዲ ዬሱሳ ደናኮ ኡሻናው ሺሺሰ።

37 ዬሱሲ ባ ቃላ ቶቁ ኦሲ ዋሲዲ፣ ሃይቂስ።

38 ያሳ ኬፋን ካቂቲዳ ማጋራጃይ ቆሞፌ ዲጌ ጋካናው፣ ናምቡ ኬዪዲ ዳኬቲ ዎቶሰ።

39 ማስቃሊያፔ ሲንፋ ባጋራ ያን ኤቁዳ ኢሲ ማቶ ሃላቃይ፣ ዬሱሲ ዋኒዲ ሃይቂዳኮ በዒዲ ዎዴ «ሃ ኡራይ ቱማ ያሳ ናዓ» ያጊሰ።

40 ሄሳ ሃሆን ኤቁዲ በዒያ ጉፋ ማጫሳቲ ዴዎሶና። ኤንታ ጊደን ማግዳላ ማይራማ፣ ካሉዎ ያይቆባኔ ዮሳ አያ ማይራማኔ ሳሎማ ዴዎሶና።

41 ሄ ማጫ አሳቲ ዬሱሲ ጋሊላን ዴዒያ ዎዴ ኢያ ካሊዲይሳታኔ ኢያ ሞኪዲይሳታ ቃሲ ዬሱሳራ ኢሲፌ ዬሩሳላሜ ቢዲ ሃራ ዳሮ ማጫ አሳቲ ያን ዴዎሶና።

ዬሱሲ ሞጌቲስ

(ማቶ 27:57-61፤ ሉቃ 23:50-56፤ ዮሃ 19:38-42)

42-43 ሳዓይ ኦማርሲዳ ዎዴ ሺቁዳ አሳን ቦንቸቲዳ አይሁዴ ሻንሳታፔ ኢሶይ፣ ዮሴፋ ጊያ ኡራይ፣ ያሳ ካዎቴላይ ያናይሳ ናጊሼ ዴዔይሲ፣ አርማቲያሳ ካታማ አሲ ዴዔይሲ ዪሰ። ዎንቴሌ ሳምባታስ ጊጌቲያ ጋላስ ጊዲዳ ጊሾ ዮሴፌ ሚኒዲ ጲላዎሳኮ ቢዲ፣ ዬሱሳ አሃ ኤካናው ዋሲሰ።

44 ጲላጾሲ ዬሱሲ ሃይቁዳይሳ ሲባዳ ዋዴ ማላሌቲስ፤ ማቶ ሃላቃ ያገዱ። «ኢ ሃይቁዳ ጋሞባዳ?» ያገዱ ኮይቸሰ።

45 ጲላጾሲ ዬሱሲ ሃይቁዳይሳ ማቶ ሃላቃ፣ ሲባዳ ኢያ ኣሃ ዮሴፋስ ኢሚስ።

46 ዮሴፊ ሞኅ ኣፊላ ሻሚስ፤ ዬሱሳ ኣሃ ማስቃሊያ፣ ሞሊዲ፣ ኣፊላን ፃዲ፣ ሹቻፊ ዋጩቲዳ ዲፎ ገደን ኢያ ኣሃ ሞገሰ። ቃሲ ሄ ዲፋዋ ዶናን ገታ ሹቹ ጎንደርሲዲ ሞሊስ።

47 ማግዴላ ማይራማኔ ዮሳ ኣያ ማይራማ ዬሱሳ ኣሃ ኤንቲ ኣጫን ሞሊያኮ ቤዖሶና።

16

ዬሱሲ ሃይቆፔ ዴንዲስ

(ማቶ 28:1-8፤ ሉቃ 24:1-12፤ ዮሃ 20:1-10)

1 ሳሞባታይ ኣጲዳፔ ጉዬ ማግዴላ ማይራማ፣ ያይቆባ ኣያ ማይራማኔ ሳሎማ ቢዲ፣ ዬሱሳ ኣሃ ቲያናው ሹቶ ሻሚዶሶና።

2 ዋጋ ዋዴ ዋንታ ዳር ጉራ ፃልቄይ ጫርሺን፣ ዲፋዋ ቢዶሶና።

3 ኤንቲ ባንታ ገደን ኢሶይ ኢሱዋራ፣ «ዲፋዋ ዶናፔ ኮስ ሹቻ ኦኔ ጎንደርሲዲ ዲጋናይ?» ያገዱ ኦዴቲዶሶና።

4 ኤንቲ ፃሊያ ዋዴ ሄ ዳር ገታ ሹቻይ ጎንደሬቲዲ ኪቸዳይሳ ቤባዶሶና።

5 ዬሱሲ ሞጌቲዳ ዲፋዋ ገዶ ጌሊያ ዋዴ ኢሲ ፓንፋ ኣዳይ ቦፋ ማዖ ማባዲ፣ ኡሻቻ ባጋራ ኡቲዳይሳ ቤባዲ ዳጋሚዶሶና።

6 ሺን ኢ ኤንታኮ፣ «ዳጋሞፊቲ፤ ማስቃሊያ ቦላ ካቄቲዳ፣ ናዚሬቲ ዬሱሳ ሂንቲ ኮዬይሳ ታኒ ኤራይስ። ኢ ሃይሳን ዴና፣ ሃይቆፔ ዴንዲስ። ኤንቲ ኢያ ሞገዳ ቤሳ ሃይሳ ቤባቲ።

7 ሃባ ቢዲ ዬሱሳ ታማሬታሲኔ ጳዲርሳስ፣ «ዮሱሲ ሂንቲፊ ሲንፋቲዲ ጋሊላ ቤስ። ኢ ሂንቲው ኦዲዳይሳዳ ሂንቲ ኢያ ያን ቤባና» ያገዱ ኦዲቲ» ያገሰ።

8 ማጫሳቲ ያሻን ኮኮሪሽ ዲፋዋፔ ከዬዲ ባቃቲዶሶና። ቃሲ ኤንቲ ያዬዳ ገሾ ሄሳ ኦዴሰካ ኣይኮካ ኦዲቦኮና። *

16:7 ማቶ 26:32፤ ማር 14:28 * 16:8 ኢሲ ኢሲ ቤኒ ማፃፋቲ ማርቆስ ዋንጌላ ፓይዶ 8 ቦላ ኣሶሶና። ቃሲ ኢሲ ኢሲ ማፃፋቲ ፓይዶ 9-20 ጋካናው ዴባያ ቆፋ ጉጃኮና። ገደሺን፣ ፓይዶ 8 ካሊዲ ዴባያ ጉጃሶና። ሄሲካ [ማጫሳቲ ቢዲ፣ ኪታንቸይ ኦዲዳባ ኡባ ጳዲርሳሲ ኢያራ ዴባይሳታስ ቃንፋን ኦዲዶሶና። ሄሳፊ ጉዬ፣ ዬሱሲ ባ ታማሬታ ጌሺኔ ሜሪና ኣቶቴፋ ዋንጌላ ኪታ ዶሎሃፔ ጫሎሃ ጋካናው ኪቲስ።]

ዩሱሲ ማግደላ ማይራሚስ በንቲስ
(ማቶ 28:9-10፤ ዮሃ 20:11-18)

9 ዩሱሲ ሃይቆፔ ዳንዲዳፔ ጉዬ ዋጋ ጋላስ ዋንታ፥ ላፑን ቱና ኢያናታ ከሱዳ ማግደላ ማይራሚስ ኮይሮቲዲ በንቲስ።

10 ኢያ ባዳ ካሴ ኢያራ ዳዔይሳታስ፥ ኤንቲ ኣዛኒሼኔ ዬኪሼ ዳዒሺን ኦዳሱ።

11 ሺን ዩሱሲ ፓፃ ዳዔይሳኔ ኢው በንቲዳይሳ ኤንቲ ሲዲዳ ዋዳ ኢያ ጌይሳ ኣማኒቦኮና።

ዩሱሲ ናምዑ ባ ታማሬታስ በንቲስ
(ሉቃ 24:13-35)

12 ሄሳፌ ጉዬ፥ ኤንታፌ ናምዓቲ ካታማፔ ከዬዲ ቢሺን፥ ኦጌ ቦላ ዩሱሲ ካሴይሳፌ ዲማቲዲ ኤንታው በንቲስ።

13 ኤንቲ ጉዬ ሲሚዲ፥ ሃራታስ ኦዲዶሶና፥ ሺን ሃራቲካ ኤንታ ኦዳ ቱማ ጊቦኮና።

ዩሱሲ ታማኔ ኢሲ ባ ታማሬታስ በንቲስ
(ማቶ 28:16-20፤ ሉቃ 24:36-49፤ ዮሃ 20:19-23፤ ሃ.ኦ 1:6-8)

14 ጉዬፔ ታማኔ ኢሲ ኢያ ታማሬቲ ካሉ ሚሺን፥ ዩሱሲ ኤንታው በንቲስ። ኤንታው ኣማኖይ ባይና ጊሹኔ ሃይቆፔ ኢ ዳንዲዳይሳ በዒዳ ኣሳይ ኦዲን ኤንቲ ኣማኖና ኢዲዳ ጊሹ ኢ ኤንታ ቦሪስ።

15 ኢ ኤንታኮ፥ «ቢታ ኡባ ቢዲ ኣሳ ኡባስ ዋንጌላ ኦዲቲ።

16 ኣማኔይኔ ፃማቄቴይ ኣታና፥ ሺን ኣማኖናይ ፒርዳታና።

17 ኣማኔይሳታስ ሃ ማላታቲ ኢሜታና። ኤንቲ ታ ሱንሳን ቱና ኢያናታ ከሳና፥ ኦራላ ዶናን ኢዳታና።

18 ኤንቲ ሾሹ ኦይኪኮካ ዋይኮ ዋዲያባ ኡዩኮካ ኤንታ ቆሄና። ቃሲ ኤንቲ ባንታ ኩሺያ ሃርጋንቾታ ቦላ ዋሉዲ ኤንታ ፓላና» ያገሲ።

ዩሱሲ ፑዴ ሳሎ ከዩስ
(ሉቃ 24:50-53፤ ሃ.ኦ 1:9-11)

19 ጎዳይ ዩሱሲ ታማሬታራ ኦዳቲዳፔ ጉዬ ፑዴ ሳሎ ከዩስ፤ ያሳፌ ኡሻቻ ባጋራ ኡቲስ።

20 ኢየሁዳ ታማራቲ ቢዳሶ ኡባን ቃላ ኦዲደሶና። ጎዳይካ ኤንታራ ኢሲፌ ኦፊሰ። ኤንቲ ኦዲያ ቃላይ ቱማ ገዲዲይሳ ያሳይ ኤንታው ኢሚያ ማላታታን ኤሪሲሰ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5